

# *BILEI YA MOLIMO*

## *NA NTANGO ELONGBANI*



Ndimba kaka, ndimba kaka,  
Nyonso ekoki kosalema, kaka . . .

Boni, sikawa boye:

Sikawa nandimi, sikawa nandimi,  
Nyonso ekoki kosalema, sikawa nandimi;  
Sikawa nandimi, sikawa nandimi,  
Nyonso ekoki kosalema, sikawa nandimi.

Tótíkala ya kotelema sikawa, wana togumbi mitó.

Nkolo, tika ete oyo ézala bobele loyembo te, kasi bozindo mpenza ya mitema na biso koyemba makasi ete: “Sikawa nandimi!” Mokolo moko, bayekoli balobaki, sima na Yesu kosala misala na nguya mingi mpenza, balobaki: “Nkolo, sikawa tondimi.”

Yesu alobaki: “Bondimi sikawa?”

<sup>2</sup> Balobaki: “Tondimi ete Oyebi makambo nyonso, pe osengeli na moto moko te mpo na kolakisa Yo.” Na bongo, Tata, na mpokwa oyo tososoli ete Osengeli na malakisi na biso te, kasi biso tosendeli na oyo ya Yo. Na yango tobondeli ete Ólakisa biso ndenge ya kobondela, ndenge ya kobika, pe ndenge ya kondima. Kokisa yango, Nkolo, kati na liyangani ya mpokwa oyo. Soki tozangi eloko moko, pesa biso yango, Nkolo. Tosengi yango na Nkombo na Yesu. Amen.

<sup>3</sup> Nayebi ete mingi kati na bino bozali ya kotelema lisusu na mpokwa oyo. Pe, na libanda, nakutanaki na bato oyo balobaki ete bakokaki kokota te, pe bazali koyoka na ba-radio na bango, kati na mituka. Pe sikawa tokomeka kosala noki-noki mpenza na mpokwa oyo, mpokwa ya lomingo, tokomipesa na mabondeli mpo na babeli, tokozala na molongo ya mabondeli ndenge tokokoka kosala yango awa liboso. Kasi topesi liyangani ya mpokwa oyo mpo na kobondela mpo na babeli.

<sup>4</sup> Pe nalingi ete bóléndisama sikawa kati na . . . na Malako oyo ya Bule ya Nzambe, kati na Kondima, Kondima ya ntango oyo. Kondima! Ekosenga kondima mingi, koleka oyo etikala kozala na bileko nyonso, mpo oyo esengeli kozala kondima mpo na konétolama, komemama na likolo. Na bongo, tolingi ete bóndima, na mpokwa oyo, nyonso oyo bosili komona pe koyoka, Liloba oyo boyokaki koteyama, bi—bilembo pe bikamwa oyo bosila komona yango kosalema. Tolingi ete bóbombamba nyonso

wana na mitema na bino, pe bólandela yango, soki ezali Nzambe to te.

<sup>5</sup> Ezali lokola Elisa ya kala, alobaki: “Soki Nzambe azali Nzambe, na boye, bósalela Ye.” Pe soki Yesu azali na kati-kati ya makambo nyonso mpo na Moklisto, boye nakanisi ete tosengeli kotika makambo mosusu nyonso pe kokangama na Ye. Bómikanisela, Azali Kati-kati yango, Azali Monzoto ya Nordi, Azali Ekimelo ya suka, Azali Etemelo. Pe soki Ye azali Monzoto ya Nordi. . . Ezali na eloko se moko oyo ekotalisa monzoto ya nordi, ezali boussole oyo ókonanáká na yango. Pe Boussole oyo nazali koluka konana na yango, ezali Liloba, pe Liloba etalisaka na Ye ntango nyonso.

<sup>6</sup> Pe tókoyoka lokola tozali koleka na ntango moko monene ya mpasi pe mimekano, kotungisama ya ntango pe mpasi kati na bikólo, makambo ndenge na ndenge ezali kosalema, pe ntango mosusu namemamaka. . . Bisika nyonso nakotala, ezali lokola likolo na . . . kati na masuwa likolo na mai-na-mbu. Pe bapesi ngai mokumba ya Masuwa yango. Pe tokokóma malamumu ndenge nini? Pe tala mbóngé moko ya pémbé likolo eteleme, eleki masuwa na ngai na monene mbala mokama. Kasi tokoleka likolo na songe yango, moko moko. “Tozali koleka balóngi, na nzela na Ye.” Kapitène, Kapitène Mokonzi, nde asimbi singa yango na suka ya masuwa, Ye moto akolekisa yango. Tokoleka likolo na songe ya moko na moko na yango.

<sup>7</sup> Sikawa, na mpokwa oyo, mpo tósala nokinoki pe kotika bino bólima na ngonga malamumu. . . Totondi bino na ndenge bokumbaka ntaka molai, pe nyonso wana, ndenge bosengeli kotambola na mituka, pe bomipimi oyo bosengeli kosala. Bomoni, yango esálaka ete nátelema esika natelemi pe kokoba koloba pe kosála nyonso oyo nakoki kosála mpo na kosunga bino. Kasi ntango nazalaka awa, nalukaka kosala mpenza nyonso nakoki kosala, mpo na kosunga na ntango tozali awa sikawa. Bongo ózua. . . Soki opesi bato makambo mingi koleka mbala moko, bakosimba yango te. O—osengeli kozua likambo se moko pe kotalisa yango malamumu mpenza liboso na moto yango kino bakososola yango. Na bongo ntango basimbi yango makasi mpenza na mitema na bango, na ntango wana bako. . . na sima nde teya bango likambo mosusu. Bobele litambe moko sima na mosusu wana tókokende.

<sup>8</sup> Sikawa, bóbondela pe bózala na mpiko, pe bóndima sikawa, na mpokwa oyo, mpo na kobikisama. Nandimi te ete ntembe moko ezali na makanisi na bino mpo na ntango oyo tozali kobika na yango. Nandimi te ete ntembe moko ezali na makanisi na bino mpo na koyeba soki Nzambe azali katikati na libota na Ye to te. Nandimi ete bino nyonso bondimaka yango. Pe ngai. . . Ntembe moko te ezali na makanisi na ngai mpo na yango. Pe na—na—nayebi ete bato na ngai, baninga na ngai, baninga ya Klisto, bana ya—ya Klisto, bandimaka yango.

<sup>9</sup> Pe epesaka ngai esengo mingi ya komona, ntango oyebi ete ozali na Nsango kouta na Nzambe, pe opesi yango na bato, pe komona bato yango koyamba Yango. Boye okobwaka miso na sima pe okoloba: “Natondi Yo, Tata.” Oh, ezalaka mpenza esengo na ntango yango, komona ndenge bana bazali kolia Lipa oyo batindeli bango! Bozali koyeba ete yango ezalaki nde emononeli, eleki mibu mingi, awa na mongombo oyo? Ezali solo: “Lipa ya Bomoi.” Ndeko Neville, oyebi yango lisusu, ntango mosusu. Eleko malamumu mpenza!

<sup>10</sup> Sikawa tófungola, soki bolingi kolanda litáangi to kokoma yango, bobele. . . nandimi te ete ekozala malamumu koyangana kozanga kotánga Liloba na Nzambe pe kopesa mwa ndimbola, soki ekozala liyangani ya kobondela mpo na babeli to eloko moko bongo. Bisu nyonso tozali kososola. Mopaya azali kati na bisu awa te, nabanzi. Kasi bisu nyonso tozali kososola eloko nini kobikisama na nzoto ezali. Ezali eloko moko te oyo moto asali mpo na yo; ezali oyo Nzambe asílá kosala mpo na yo. Lobiko ezali na molongo moko wana. Likambo se moko, ezali, komema bato kondima ete yango ezali Solo. Nzambe alakisaka yango na Liloba na Ye, pe na sima Atalisaka yango polele epai na baoyo bakondima Yango, mpo Alobaki: “Nyonso ekoki kosalema na baoyo bandimi.”

<sup>11</sup> Bolobaka: “Epai na Nzambe, eloko moko te ekoki kozanga kosalema.” Bondimi yango? Eloko moko te ekoki kozanga kosalema epai na yo pe. “Mpo nyonso ekoki kosalema epai na baoyo,” (Nzambe azali bobele Moto moko) “epai na baoyo bandimi.” Bomoni? Na bongo, eloko moko te ekoki kozanga kosalema ná yo, mpo na yo, soki okoki bobele kondima.

<sup>12</sup> Sikawa na Mikonzi ya Liboso, mokapo ya 17, nalingi kotánga milongo nsambo ya ebandeli, soki Nkolo alingi.

*Eliya, Motisibi, moko na bato ya Gilada, alobaki na Akaba, Lokola YAWÉ Nzambe ya Yísalaele, oyo natelemi liboso na ye, azali na bomoi, na mibu oyo, mamawe to mbula ekozala te, bobele na liloba na ngai.*

*Pe liloba na YAWÉ eyelaki ye ete,*

*Longwa awa, kende na esti, kende na ngámbo ya esti, pe ómibomba pembeni na mokele ya Kerite, oyo ezali na esti ya Yordani.*

*Okomela mai ya mokele, pe napesi biyanganga mitindo ete báleisa yo kuna.*

Bótala: “báleisa yo kuna”, esika mosusu te. “Kuna!”

*Boye, akendeki pe asalaki kokokana na YAWÉ, to na liloba na YAWÉ: bongo akendeki pe akómaki kofanda pembeni na mokele ya Kerite, oyo ezali na esti ya Yordani.*

*Biyanganga ezalaki komemela ye lipa ná mosuni na ntongo, pe lipa ná mosuni na mpokwa; pe azalaki komela mai ya mokele.*

*Na sima na mwa ntango, mai ya mokele yango ekaukaki, mpo mbula ebetaki te na mokili.*

<sup>13</sup> Nkolo ábakisa mapamboli na Ye na litángi ya Liloba na Ye. Pe sikawa, na mpokwa oyo, nalingi kozua motó ya liteya uta na wana, ekobengama “Bilei ya molimo na ntango na Yango”. Na ntongo oyo to—toyekolaki na—na ntina na “Kosalela Nzambe mosala, to koluka kosalela Ye mosala kozanga kozala . . . -zanga ézala ntango, eleko, esika, to moto yango”. Pe sikawa oyo ezali: *Bilei Ya Molimo Na Ntango Elongobani.*

<sup>14</sup> Mosakoli oyo, Eliya, toyebi mingi mpenza te na ntina na ye. Kasi toyebi ete azalaki mosali na Nzambe, pe mosali na Nzambe mpo na eleko wana.

<sup>15</sup> Pe Nzambe asili kosalela Molimo na Ye oyo ezalaki likolo na Eliya, mbala misato, pe alaki mbala mibale lisusu; mbala mitano, mpo na ngolu. Asalelaki Yango likolo na Eliya; Eyaki likolo na Elisa na ndambo mibale; ezalaki likolo na Yoane Mobatisi; pe esengeli koya mpo na kokotisa Mwasi na libala ya Mabota; pe ekoya, elongo na Mose mpo na kozongisa Bayuda na ndako. Ezali solo. Nzambe alaki kosalela Molimo ya Eliya mbala mitano, pe asili kosala yango mbala misato.

<sup>16</sup> Sikawa, mosakoli monene oyo, toyebi esika autaki te. Toyebi ete azalaki Motisibi. Kasi ndenge ayaki . . .

<sup>17</sup> Toyebaka makambo ya basakoli mingi mpenza te. Toyebaka te esika bautaka. Esalemaka mingi te . . . Na bongo, nayebi ata moko te oyo autaki na lingomba to azalaki na bakitani sima na ye. Bazalaki bobele bato lokola bato nyonso, babangaka eloko te, pe, mbala mingi, batángá te. Pe bakomá ata mokandá moko te, bango moko. Yisaya ná Yilimiya, mibale to misato kati na bango, nde bakomáki mwa mikanda, kasi moto monene oyo, Eliya, atikala kokoma eloko moko te. Mingi kati na bango bakomaki te; ntango mosusu bayebaki kokoma te. Kasi bazalaki bato ya makambo makasi. Moto ata moko te na Biblia azalaki lokola basakoli yango ya kala. Batéléfélaki bokonzi, bakonzi, mabota, mangomba, pe makambo nyonso mosusu, batelemaki ngwi na Liloba na Nzambe, pe Nzambe atalisaki polele ete bazalaki koloba solo. Bazalaki mpenza bato moko ya makambo makasi.

<sup>18</sup> Pe Eliya oyo azalaki moko na moto ya makambo makasi koleka kati na bango nyonso. Azalaki moto ya biliki. Autaki na biliki; azalaki kobika na biliki. Biblia elobi ete alataki elamba ya nkunza ya nyama. Amizipaki na loposo ya mpate, pe eteni ya loposo ya nyama, loposo ya kaméla alátá na loketo na ye, mpenza . . . elongi etóndá na mandefu, nabanzi ete azalaki mpenza komonana moto ya makambo makasi, na kotala ye.

<sup>19</sup> Kasi tosali te . . . bango nyonso bakufaki te. Bango nyonso—bango nyonso bakufá te. Na eleko ya Likita ya Nicée, mingi kati na bino baoyo botánga *Likita ya Nicée ya Lingomba ya Ebandeli*, ntango balingaki kokómisa yango ebongiseli, koboma mangomba nyonso mosusu, pe kokomisa yango se moko, ntango basalaki Likita ya Nicée wana, bato ya makambo makasi lokola Elisa bayaki wana, bautaki na biliki, bazalaki kolia bobele matiti; bato ya makambo makasi mpenza. Kasi bato ya lokumu, bato minene, bato ya Constantin, pe nyonso wana, bapekisaki mongongo na bango eyokana. Mpamba te bango, lokola basakoli, bayebaki ete mbuma ya lisango ya Lingomba Mwasi na libala esengelaki kokweya na mabelé, motindo moko oyo mbuma ya lisango kati na Mobali na libala esengelaki kokweya na mabelé. Pe etikalaki wana mibu nkoto mobimba.

<sup>20</sup> Yango wana bakomaka na ba-búku lelo: “Wapi Nzambe wana alobaka te, oyo akokaki kofanda kimia pe kotala, komona ndenge bazalaki koboma bana mike, ndenge ba-nkósi ezalaki kopasola basi biteni-biteni, pe afandi na likolo kozanga ata likambo ya koloba?” Bayebi Liloba te. Mbuma ya lisango wana esengelaki kokweya na mabelé. Ndenge nini Nzambe ya sembo akokaki kofanda kimia pe kotala Mwana na Ye Moko kokufa, kobwakelama nsoi, pe bongo na bongo? Kasi ekokani na Liloba, esengelaki bongo. Ezali pe ndenge wana, kino na eleko oyo.

<sup>21</sup> Moto oyo, azalaki moto monene. Azalaki na libota ya bato ya masumu liboso na ye. Akaba azalaki mokonzi, tata na ye, liboso na ye, azalaki moto mabe. Kobanda ntango ya Salomona, bakonzi nyonso balandaki bazalaki bato mabe. Pe moto oyo, Akaba, oyo akonzaki Samalia mibu ntuku mibale na mibale, azalaki mabe koleka bango nyonso. Azalaki mpenza moto ya makambo ya mikolo oyo. Na ntembe te, azalaki kondimela makambo ya losambo. Pe akotisaki makambo ya mikolo oyo na bisika nyonso. Azalaki na basakoli na ye nkama minei ya Baebele, bango nyonso batángá pe bayékolá malamú. Nzambe atindelaki ye moko, kasi alingaki kondimela ye te, ezalaki nde Eliya.

<sup>22</sup> Kasi Eliya, Motisibi oyo, azalaki moto ya biliki. Moto na ntóki ya maloba te; azalaki moto ya makambo makasi. Mokolo moko, sima na Akaba kosala masumu mpenza kino Nzambe akokaki lisusu koyikela yango mpiko te, Asololaki na Eliya na biliki. Pe tala ye wana asimbi nzela ya Samalia, ndenge natalisaka yango mbala mingi; ntango mosusu ná mandefu ya pembe etondá ye na elongi, libandi na ye kongengáká na moi, ná miso na ye mike, kuna, ná lingenda na loboko, ná komungamunga, akendeki semba tééé epai na mokonzi ya Yisalaele, pe alobaki: “Ma . . . Ata mamwe ekokita te, kino nábéngisa yango.”

<sup>23</sup> Nzambe pesá biso bato ya ndenge wana, bomoni, bato oyo bayebi eloko bazali kosala ná YANGO ELOBI NKOLO.

24 Sikawa, tomoni ete liboso ye ásala yango, Nzambe abengaki ye. Nzambe asololaki na ye, yango wana azalaki kobanga eloko moko te. Azalaki kobangela nsango na ye te, ete ekokokisama te; ayebaki ete ekokosisama! Ayebaki ete ekokanaki na Liloba ya Nkolo, pe ayebaki ete azalaki mosakoli ya Nzambe mpo na eleko yango. Yango wana, ata soko mokonzi alingáki kokáta moto na ye, kobwáka ye na boloko, eloko nyonso balingaki kosala, yango ezalaki na ntina moko te epai na ye; azalaki na etinda: “YANGO ELOBI NKOLO”, liboso mpenza ya mokonzi. Oyo moto ya matátá mpenza! Kasi liboso na ye kosala yango, ásakolaki bokauki monene oyo . . .

25 Mpo Nzambe akotika lisumu kozanga etúmbu te. Etúmbu esengeli kozala. Mobeko oyo ezangi e—etúmbu, ntina na yango nini? Ntina nini koloba: “kokatisa mwinda motane ezali kotelemela mobeko”, pe lománde moko ezali te sima na yango, to etúmbu moko te sima na yango? Ezali na yango mobeko te. Boye etúmbu ezalaka mpo na lisumu. Pe na ntango Nzambe asali mobeko, pe babúki mobeko—mobeko yango, boye etúmbu esengeli kozala mpo na yango.

26 Pe ekólo oyo esilá kobuka mibeko na Ye nyonso. Oh, bazalaki na lingomba monene, bazalaki na tempelo. Bazalaki na bato mingi ya mayele. Bazalaki na basakoli na ekólo mobimba, bazalaki na biteyelo mpo na bango, ezalaki kobimisa bango lokola na masíni. Bazalaki na basakoli mingi, bazalaki na—na ba-nganganzambe mingi, bazalaki na bakomeli mingi, pe bazalaki na ba-losambo mingi, kasi bazalaki mosika na Liloba na Nzambe. Na bongo, Nzambe abengaki moto moko, libanda na milongo na bango, pe atindaki ye ná YANGO ELOBI NKOLO.

27 Pe botala ndenge Abatelaka baoyo ya Ye Moko. Liboso Átinda mosakoli oyo ná nsango, Alobaki: “Eliya, kende koyebisa Mokonzi Akaba makambo oyo. Bongo, na ntango osali yango, kende mosika na ye noki-noki, mpo Nasili kobongisela yo esika okokende na ntango ya bokauki. Nakobatela yo, Eliya, soki oteyi bobele Liloba na Ngai, sálá bobele likambo Nayebisi yo kosala.”

28 Sikawa nakotalisa na elilingi mosala monene oyo, na mpokwa oyo, ya Eliya pe eleko ya Eliya, kokokana ná eleko tozali na yango sikawa. Nandimi ete ezali elilingi moko ebongi be. Nazali kokanisa na ntina na bikólo . . . soki na . . . tozalaki na ntango ya kozonga sima, kasi nalingi nde kopesa ntango mingi na molongo ya mabondeli.

29 Na bongo, soki tokokaki kozonga sima pe komona, Yisalaele abotolaki Palestine na lolenge moko biso tobótólaki États-Unis. Toyaki na États-Unis oyo pe tobenganaki ba-nkólo mboka, oyo ezalaki ba-Indien, pe tobotolaki mabele yango. Yisalaele pe akotaki na Palestine ndenge wana, na bokambami ya Yosua, na bokambami ya Nzambe, abenganaki ba-nkólo mboka pe abótólaki mabele yango.

<sup>30</sup> Pe bakonzi na bango ya liboso bazalaki bato na nguya: Dawidi, Salomona, bato minene. Ba-président na biso ya liboso bazalaki bato minene: Washington, Lincoln, pe bamosusu. Bongo sukasuka, ba-président to bakonzi bakómaki se kobeba moke-moke ntango nyonso, pe sukasuka basukaki na Akaba oyo. Elilingi mpenza, ya kokokana na eleko na biso. Pe bato bakómaki kolanda mpenza makambo ya mikolo oyo kino baboyaki koyoka Liloba ya Solo ya Yawe.

<sup>31</sup> Pe bokoki kokanisa, ná bato ya makambo ya mikolo ya bongo, mosali ya solosolo ya Nzambe ya ndenge nini alingaki kozala mpo na bango. “Ee, azali libóma, motó na ye ezalaki kosala malamú te. Eloko ya ndenge wana ekokaki kosalema te.” Bazalaki basambeli, basambeli mpenza. Bazalaki bato ya sembo, bazalaki libota ya sembo. Bazalaki basambeli mpenza.

<sup>32</sup> Boye ayebaki ete ekosengela kosala koleka líkindo ya momesano, ekosengela kosala koleka—koleka ata nsango ya momesano nini, ekosengela koleka koteya Liloba, mpo na kobuka mitema na bango ya mabanga. Ayebaki ete esengelaki na YANGO ELOBI NKOLO mpo na kokitisa kosambisama wana likolo na libota wana, boye ayebaki ete akendeki nde na YANGO ELOBI NKOLO. Pe ezalaki mpenza YANGO ELOBI NKOLO. Koboya Yango ezalaki kosambisama. Tozali pe komona yango na eleko na biso. Tomonaka yango na bileko nyonso. Eloko mosusu etikalaka te, bobele kosambisama ntango moto akatishi ndelo ya mawa.

<sup>33</sup> Sikawa, elili wana, kuna, nde nakokokanisa Eliya ná lingomba lelo, lingomba ya lelo. Bobele liboso ya kosambisama, nde azuaki nsango yango. Eliya, ye azalaki kotalisa, wana abatelamaki na ndenge ya nzoto, bilei na ye ya kolia, mpamba te mbula elingaki kobeta te, kokokana na Liloba na Nzambe, mibu misato na sanza motoba, to kino ntango Eliya akobengisa yango. “Na ntango nyonso oyo yo, Eliya okoloba, yango nde ekosalema.” Na yango akendeki liboso na mokonzi, pe alobaki: “Ata mamwe ekokita te, kino nakobengisa yango.” Ezali mpenza mo—mokumba monene, boye te? Ezali mpenza nsango!

<sup>34</sup> Pe sikawa tokokokanisa yango ná bokauki ya molimo ya lelo. Sikawa, biso nyonso toyebi, toyebi yango malamú mpenza, ete bokauki monene ezali na mokili lelo, na elobeli ya molimo. Pe, boyebi, yango esakolámáká na basakoli, ete ekosalema mpenza liboso na Boyei ya mibale ya Klisto, balobaki: “Nzala ekoya na mokili, ekozala bobele nzala ya lipa te, kasi nzala ya koyoka Liloba na Nzambe.” Pe mokolo yango ezali sikawa: “koyoka Liloba ya Solo ya Nzambe.” Sikawa, likambo oyo ezali kotalisa bokauki ya nzoto ná oyo ya molimo.

<sup>35</sup> Lisumu ná kozanga kondima, na nzela ya balakisi ya lokuta ná bato ya mikolo oyo kati na lingomba, ememi yango na esika ya kosambisama oyo ékoya, oyo ezali koya. Bongo bapesaki

mokongo na Liloba na Nzambe ná mosakoli na Ye, mpo na maloba ya líkindo ya mikolo wana ya kokokana na Liloba.

<sup>36</sup> Botala awa, ezalaka mpenza na ntango wana nde Nzambe atelemisaka ntango nyonso eloko moko. Mpamba te, Ye, ntango nyonso, Asalaka likambo moko te soki Amonisi yango liboso naino te na bato, pe Amonisaka yango ntango nyonso na nzela na basali na Ye.

<sup>37</sup> Sikawa, kasi Eliya, na ntango wana, azalaki na esika moko ya nkukú, oyo Nzambe asilaki kobongisela ye kokende kuna. Yango nde likambo tolingi komona sikawa liboso ya kosala molongo ya mabondeli. Eliya azalaki na esika moko ya nkukú ebongisamanki na Nzambe Ye moko. Sikawa, lingomba etikálá kobongisa yango mpo na ye te, mokonzi ayikálá kobongisa yango mpo na ye te, amibongiselaki yango ye moko te, kasi Nzambe abongiselaki Eliya esika moko ya nkukú, mpo na koleisa ye na ntango nyonso ya bokauki, esika bilei na ye ezalaki kopesamela ye mokolo na mokolo. Azalaki na ntina ya komitungisa te mpo na oyo ekosalema lobi, to komitungisa soki bilei ekosila. Nzambe alobaki: “Napesi mitindo na biyanganga pe bakoleisa yo.” Oyo mpenza likambo kitoko, elilingi ya esika na biso ya nkukú kati na Klisto.

<sup>38</sup> Na ntango likita ya mokili mobimba pe makambo nyonso ezali kosalema lelo, balobaka: “Ntango ya bikamwa esilá koleka.” Ba-nguya minene ya Nzambe esilí kolongolama na mangomba. Ezali komonana lokola bazali lisusu na eloko moko te, bobele “ngonga ekolobaka ngbaa ngbaa pe elonja ekolobaka ngbengbele ngbengbele”. Toyebi yango ezali solo. “Pe lolenge ya kosambela, kasi bazali kowangana Nguya na yango.”

<sup>39</sup> Ezali ndenge moko na likambo oyo Dawidi asalaki, na ntongo oyo, ná makálo ya ba-ngombe, atangwaki mosika na Liloba. Ntango Liloba etalisamaki pe epesamelaki bango, baboyaki Yango; yango wana, batangwaki mosika na Yango.

<sup>40</sup> Yango nde likambo bato wana basalaki na mikolo ya Eliya, batangwaki mosika na Liloba. Bakanisaki ete bazalaki na Liloba, kasi bazalaki na Yango te. Boye botala, bongo kati na . . .

<sup>41</sup> Na ntango oyo Alingaki kopesa etúmbu na mozangi kondima, Abongisaki nzela mpo na mondimi. Asalaka likambo yango moko ntango nyonso. Na mikolo oyo Alingaki koboma mokili na mai, Abongisaki nzela ya kokimela mpo na Nowa. Na mikolo oyo Alingaki kozindisa Ezipito na mbu, Abongisaki nzela ya kokimela na ngambo ya mai-na-mbu mpo na libota na Ye. Ndenge Nzambe abongisaka mpenza nzela na Ye! Pe esika nzela ezali te, Ye azali Nzela yango. Ye nde Nzela yango!

<sup>42</sup> Sikawa tososoli ete tozali liboso na mwa . . . na moko na bangonga ya motuya mpenza koleka, oyo esilá kokoma na mokili. Ezali mpenza likambo ya ememeli missile te, ná motó na yango oyo ékongengáká, nde biso tosengeli kobanga. Ezali mangomba



nde tosengeli kobanga. Ezali ngonga oyo tozali kobika na yango nde tosengeli kosenzela.

<sup>43</sup> Sikawa botala, kasi Nzambe abongisaki nzela ya kokimela mpo na Eliya. Abongisi pe nzela mpo na bana na Ye oyo bazali kondima, mpo na kokima sikawa, nkanda pe makambo oyo ezali koya.

<sup>44</sup> Mpamba te, Nzambe akoki te kozala sembo mpo na kosambisa bato yango pe kopesa bango etúmbu, kozindisa Sodoma ná Gomora, kozindisa Kapernaume na kati ya maina-mbu, pe kokweisa bato ya ekeke wana, pe Sodoma ná Gomora, pe na sima átika biso tósala makambo yango moko pe tózanga kozwa etúmbu. Na ntembe te tobongi mpenza mpo na kosambisama, lokola bango pe babongaki mpenza mpo na kosambisama. Sikawa, tomoni ete . . .

<sup>45</sup> Ntango makambo oyo esalemaki, etamboleli ya makambo ya mikolo ya eleko wana, Nzambe atelemisaki moto moko na eleko wana, to, pe, abimisaki moto moko mpo na kobundisa ba-nguya yango, kasi balingaki koyoka yango te. Bakanisaki ete azalaki libóma, “Motó na ye ezalaki kosala malamau te. Azalaki mobange moko ya fanatik, zóba moko auti na biliki, zámbe ebélisá ye libóma”. Kasi, ata bongo, azalaki na Liloba na Nkolo.

<sup>46</sup> “Liloba elingi koloba te oyo Yango elobi”, yango nde balobaka lelo. “Oh, ee, Biblia ezali buku ya masolo-ya-kala.” Nabanzi bosílá komona yango, pe bakómi koloba sikawa, ete “Eva aliaki mbuma ya póme te, aliaki nde . . .” Ezalaki nini? Nakanisi . . . “Ezalaki mbuma ya abricot,” yango nde bakómi koloba. “Ezalaki mbuma ya abricot.” Pe lisusu, ete “Mose atikálá kokatisisa bana Mai-na-mbu Motane ata moke te. Ezalaki nde zamba monene ya ba-kékélé, kuna na ngambo mosusu ya maina-mbu yango, pe akatisaki nde mai-na-mbu ya kékélé”. Boye, ndenge nini mai, m-a-i, esalaki bitutú na ngámbo nyonso mibale pe bakatisaki mabelé ekaúká ndenge nini? Oh, oyo mpenza boléma! Kasi, bomoni, esengaka mokolo ya boye mpo na kokitisa nkanda ya Nzambe likolo na bato. Esengeli mpenza.

<sup>47</sup> Balobaka ete makambo ya boye ezalaka te, lokola—lokola oyo . . . Ata bato basambelaka bandimaka bikamwa te. “Nakopesa yo ba-dollar nkóto,” balobaki, “lakisa ngai ekamwiseli. Lakisa ngai ekamwiseli!” Ee, bakokaki komona yango te ata soki makambo nkóto zomi esalemaki liboso na bango. Ee, bango, balingaki komona yango ata moke te.

Okoloba: “Ekoki kosalema te.” Oh, te, ezali bongo te.

<sup>48</sup> Mokolo moko Eliya azalaki na Dotane, pe mampinga ya ba-Síria eyaki kozinga engumba, mpo na kokanga ye, mpo bayebaki ete kuna nde nguya ya—ya ekólo wana ezalaki, ezalaki kati na momóni wana. Ee, mokonzi . . . Moko na bato yango ayebisaki mokonzi ya Síria, alobaki: “Ee, oyebi, Eliya mosakoli, Motisibi,

ye moto ayebisaka mokonzi ya Yisalaele makambo yo olobaka na ndako na yo ya nkukú.”

<sup>49</sup> Alobaki: “Bókende kokamata moto yango! Ye nde moto oyo azali kotiéla biso nkáká.” Pe mampinga mobimba ya Síria ezingaki na mayele Dotane. Bazalaki bango nyonso nzinganzinga na yango.

<sup>50</sup> Pe Gehazi, mo—mosali ya mosakoli, alamukaki, pe alobaki: “Oh, tata na ngai, mampinga ezingi biso mobimba awa. Bazingi biso bisika nyonso mpenza.”

<sup>51</sup> Alobaki: “Ee, baoyo bazali elongo na biso bazali mingi koleka baoyo bazali elongo na bango.” Bomoni?

Gehazi atambwisaki miso zinga-zinga, alobaki: “Nazomona moto moko te.”

<sup>52</sup> Alobaki: “Nkolo Nzambe, fungola miso ya mwana mobali oyo.” Pe miso na ye efungwamaki, pe ba-ngomba nyonso etondaki na Banje ná makálo, bazalaki zinga-zinga, Mampinga oyo emonanaka te.

<sup>53</sup> Eliya akendeki kuna, pe Biblia elobi: “Abomaki bango miso.” Akendeki kokutana na bango; miso na bango ezangaki koyeba ye. Akendeki kuna pe alobaki: “Bozali koluka Eliya?”

Alobaki: “Iyo, tozali koluka ye.”

<sup>54</sup> Alobaki: “Bóya, nakoyebisa bino esika ye azali”, pe akambaki bango na motámbo, esika mpenza mampinga ezalaki libanda pe bakangaki bango.

<sup>55</sup> Sikawa, Biblia elobi: “Abomaki bango miso.” Yango ekati likambo. Pe lelo bato bakufi mpenza miso na molimo, atako Nkolo Nzambe akiti kati na bato pe asali ata likambo nini, pe makambo Alakaki, bango bakokoka komona Yango kaka te. Basili kokúfa miso na molimo; bayebi Nzambe te, bayebi Nguya monene na Ye te. Sikawa, tomoni ete basalaki yango na mikolo ya Eliya, pe bazali kokoba kosala yango kino lelo. Nzambe abomi bango miso. Lelo bákoloba, ete: “Bikamwa ezalaka te, makambo ya ndenge wana ezalaka te, nyonso oyo ezali liyóki”.

<sup>56</sup> Balobaki pe bongo mpo na Eliya, mpo, ntango anetolamaki pe Elisa azuaki esika na ye, elenge mobali, oyo abimaki libandi, na bolenge, bana mike bazalaki kolanda ye na sima, pe koloba: “Mobange moto na libandi, mpo na nini omataki elongo na Eliya te?” Bomoni, mpo na kobanda, bato yango bazalaki ata kondima Yango te, sima na makambo mingi oyo esalemaki. Pe moto monene ya Nzambe oyo asilaki konetolama kino Likolo na nzela ya likálo na móto, kasi bato bazalaki kaka kondima Yango te. Pe batikaki bana mike na bango bálanda moto oyo na sima pe báloba: “Mobange moto na libandi, mpo na nini omataki te?” Bomoni? Na bongo mosakoli alakelaki bana yango mabe, pe mama-ngombolo moko ebomaki bana yango ntuku minei na mibale.

<sup>57</sup> Sikawa botala. Lelo, ndenge esalemaki na eleko wana, bazali kotia ndimbola na bango moko na Liloba. Sikawa, soki balingi kosala yango, etali bango, kasi bazali koluka kondimisa biso yango. Biblia elobi: “Liloba na Nzambe oyo esengeli na ndimbola ya moto moko te.” Nzambe asalaka ndimbola na Ye Moko. Nzambe akokisaka Liloba na Ye, yango nde ndimbola na Yango. Ndenge nalobaka yango mbala mingi, na ebandeli Alobaki: “Tika polé ézala”, pe polé ezalaki. Yango ezali na ntina ya kolimbolama te; esalemaki. Alobaki: “Mongondo akokumba zemi,” akumbaki yango. Alobaki ete “akosopa Molimo na Ye,” Asalaki yango. Pe Alobaki ete: “na mikolo ya suka”, makambo oyo Akosala, pe Azali kosala yango! Ezali na ntina ya ndimbola moko te; Nzambe azali kolimbola Ye Moko. Ata moto ya boléma alobi nini, yango ekopekisa Nzambe ata moke te.

<sup>58</sup> Ntango Yesu azalaki na mokili, Akutanaki na kozanga kondima monene ndenge tozali na yango lelo, ntango mosusu pe koleka. Kasi yango etelemisaki Ye te; Akobaki kosala pe kokokisa lotómo na Ye, pe Nzambe azalaki kokokisa nyonso oyo Azalaki kosala. Alobaki: “Nazali Ngai moko te. Tata na Ngai ná Ngai tozali moko; Afandi kati na Ngai. Ngai moto Nasalaka misala yango te, ezali Tata oyo afandi kati na Ngai. Soki Nazali kosala misala na Ye te, boye bondima Ngai te; kasi soki Nazali kosala misala, ata bondimi Ngai te, bóndima misala.” Bomoni? Na elobeli mosusu, bango . . . “Bolukaluka na Makomi,” Alobaki, “mpo na yango nde bobanzi ete bokozua Bomoi na Seko, na nzela ya koyeba Makomi. Pe Makomi, Yango moko, mpenza nde etatoli na ntina na Ngai.” Amen! Oyo mpenza esákolá! “Yango nde, Makomi, ekoyebisa bino Nani Ngai nazali,” Yesu alobaki.

<sup>59</sup> Pe ezali Makomi nde ekoyebisa bino ntango tozali kobika na yango. Pe makambo oyo bozali komona kosalema, ezali Nzambe Ye moko kati na libota na Ye. Eloko moko te ekoki kosekwisa bakufi bobele Nzambe. Eloko moko te ekoki kosala makambo oyo Azali kosala sikawa, bobele Ye. Mpo Biblia elobi: “Azali motindo moko lobi, lelo pe libela.”

<sup>60</sup> Sikawa, na boye, tozali komona lolenge ya mikolo oyo ya bato: “Oh, ntango wana esilá koleka, eloko lokola bikamwa ezalaka te. Bato bamemamaka nde na mayanga ya boyóki na bango.”

<sup>61</sup> Boyoka Eliya yango, mosakoli, kogángela bango ná bato na bango ya líkindo. Botala, botala, alobaki lokola soki azalaki Nzambe Ye moko. Eliya alobaki lokola soki azalaki Nzambe Ye moko: “Mamwe ekokweya longwa na likolo te soki ngai nabengisi yango te.” Amen! Iyo, misie. Mosakoli yango aumeláki mingi mpenza Liboso na Nzambe!

<sup>62</sup> Basakoli ya Kondimana ya Kala, to eleko nyonso mosusu, ntango babikaka Liboso na Nzambe kino bakómaka Liloba, Nsango na bango ezalaka Liloba Yango moko. Pe, bomikanisela,

alobaki: “YANGO ELOBI NKOLO.” Ntango bato yango bazalaki kozua ba-nsango yango longwa na Nzambe, bazalaki komikotisa mpenza na lolenge ete makanisi na bango moko. . . Ekokaki ntango mosusu kotelemela makanisi na bango, bakokaki ntango mosusu kokoka ko—kososola yango malamau te. Kasi bazalaki koloba Liloba na Nzambe: “YANGO ELOBI NKOLO.”

<sup>63</sup> “Mbula ekobeta te, soki ngai nabengisi yango te.” Oh, maloba nini boye! Autaki kozala Liboso na Nzambe, pe atamolamaki mpenza mpenza. Pe, bomikanisela, ezali pe kolandana ná Amosa 3:7, “Nkolo Yawe akosálá likambo moko te bobele ete Ámonisa yango liboso na baombo na Ye basakoli.” Alobaki: “Mbula moko te ekotikala kobeta!” Liboso ye. . .

<sup>64</sup> Basekaki ye, bakanisaki ete abeli libóma: “Wana suka na fanatik!” Kasi, bomoni, azalaki na YANGO ELOBI NKOLO, ete mbula ekobeta te. Pe Nzambe, liboso na ye kosala yango, Amonisaki yango na Eliya, mosali na Ye. Pe azalaki mpenza mosakoli oyo atamolami pe andimisami, boye bato basengelaki kobongola motema. Kasi, na esika ya wana, basekaki ye nde, balobaki: “Oh, tozangi mbula te! Bibombelo etondi meke. Bibale ezali kotiyola malamau.”

<sup>65</sup> Biblia elobi ete: “Ata mamwe ekweyaki te, mibu misato na sanza motoba.” Mikélé nyonso pe mai nyonso ekaukaki, bisika nyonso. Ezalaki moto yango te, ezalaki nde Nzambe kolobáká na nzela ya moto yango. Yango nde “Ngai” oyo elobamaki. Toyebaka yango. Boye ye. . .

<sup>66</sup> Tomoni ete ntango moto moko ayei, atindami na Nzambe, abongisámi na Nzambe, ná YANGO ELOBI NKOLO, nsango ná motindami bazali moko pe motindo moko. Mpo atindami mpo na kotalisa YANGO ELOBI NKOLO, Liloba na nzela ya Liloba, na bongo ye ná nsango na ye bazali motindo moko.

<sup>67</sup> Moto ya ebongiseli oyo akambámi na ebongiseli, ye ná lingomba bazali “moko”. Moto na líkindo na nse ya líkindo oyo esalemi na ebongiseli, ye ná nsango na ye bazali moko; lingomba ya líkindo, moto na líkindo. Ezali mpenza bongo.

<sup>68</sup> Bongo soki moto ayei ná YANGO ELOBI NKOLO, ye ná Nsango bazali moko. Ntango Eliya ayaki ná YANGO ELOBI NKOLO, ye ná nsango na ye bakómaki moko. Ndenge moko na Yesu, ntango Ayaki, Azalaki Liloba, Santu Yoane 1. Na bongo, Liloba na Nzambe ná motindami ya eleko yango bazalaki mpenza se eloko moko, ntango nyonso. Ezali solo.

<sup>69</sup> Yesu azalaki Liloba oyo esakolamáki. Azalaki oyo basakoli balobáká ete ekosalema: “Mongondo akokumba zemi pe akobota Mwana oyo.” Kala kala na ebandeli mpenza, Nzambe ayebisáki bango, alobaki: “Momboto ya mwasi akotuta motó ya nyoka, pe ye akoswa litindi na ye.” Masakoli nyonso wana epesamáká. Dawidi na koleláká, basakoli mosusu nyonso kuna kati na

bileko, balobeláki Ye. Azalaki Liloba wana emonisami polele! Aleluya!

<sup>70</sup> Sikawa bomoni esika nalingi kokóma? Nalobaki na bino polele mpenza na ntongo oyo. Bozali komona bokonzi ya Nzambe na bomoi kati na Lingomba ya bomoi te, Mwasi na libala? Babeli bazali kobika, bakufi bazali kosekwa, batengumi bazali kotambola, bakufi miso bazali komona, Nsango-malamu ezali koteyama na nguya na Yango, mpo Nsango ná motindami bazali motindo moko. Liloba ezali kati na Lingomba, kati na moto.

<sup>71</sup> Liloba na Nzambe ezalaki kati na Eliya, ntango amatáki kuna ná YANGO ELOBI NKOLO, pe alobaki “Mbula ekobeta te.” Ezalaki Eliya te; wana ezalaki Nzambe kati na Eliya.

<sup>72</sup> Nalobá yango mbala mingi, ndenge mwasi ya Science Chrétienne ayebisáká ngai, mokolo moko. Nalobelaka yango mbala mingi. Alobaki: “Misie Branham, okumisaka Yesu mingi koleka.”

Nalobaki: “Nabanzi ete yango nde likambo moko oyo nakosamba mpo na yango.”

Alobaki: “Ókoluka kokómisa Ye Nzambe.”

Nalobaki: “Azalaki Nzambe.”

<sup>73</sup> Alobaki: “Oh, Azalaki mosakoli, Azalaki moto malamumu, kasi Azalaki Nzambe te.”

<sup>74</sup> Pe nalobaki: “Ee, lakisa ngai Likomi moko oyo elobi ete Azalaki yango te.”

<sup>75</sup> Alobaki: “Na Buku ya Santu Yoane, ekomami ete Ye ‘alelaki’, ntango Akendeki na nkunda ya Lazalo.”

<sup>76</sup> “Ee,” nalobaki, “ya solo, Alelaki. Azalaki moto pe Nzambe, nyonso mibale. Azalaki moto, na koleláká; kasi Asengelaki kozala Nzambe mpo na kosekwisa mokufi.” Ya solo. Nalobaki: “Azalaki moto, ná nzala; kasi Azalaki Nzambe ntango aleisaki bato nkóto mitano, ná mápa mibale ná mbisi mitano.” Ezali solo. “Azalaki moto ntango aláláki sima ya bwáto; kasi ezalaki Nzambe kati na Ye nde akokaki kofandisa mai kimia.” Mpo na nini? Ye ná Nsango na Ye bazalaki moko.

<sup>77</sup> Alobaki: “Ngai ná Tata na Ngai tozali moko. Tata na Ngai azali kofanda kati na Ngai.” Azalaki litondi ya Bonzambe kati na nzoto.

<sup>78</sup> Namoni ete ezalaki mpenza likambo makasi, mokolo wana, ntango nazalaki koteya *Bileko Nsambo Ya Lingomba*. Eloko ya liboso, na—nazalaki kokoka kososola te ndenge Yesu azalaki wana ná ba...ná mpembe wana likolo na Ye ndenge wana, elobaki ete: “Suki na Ye ezalaki mpembe lokola léni.” Nakokaki kososola te ndenge nini moto ya mibu ntuku misato na misato akokaki kozala na suki ya mpembe pee.

<sup>79</sup> Nabengaki moto ya líkindo malamú moko, moto na líkindo ya ba-Pantekotiste, moninga na ngai ya malamú mpenza. Ee, ezalaki Ndeko Jack Moore. Azali moto ya mayele mingi mpenza. Alobaki: “Ndeko Branham, ezalaki Yesu akembisami. Ezali lolenge wana nde Akómaki sima na Ye kokembisama.” Te, nakokaki kondima yango te. Te.

Na—na—nalobaki: “Ee, Ndeko Moore, natondi yo.”

<sup>80</sup> Nakotaki na eteni ya ndako kuna, pe nabandaki kosolola na Nzambe. Nalukaki na concordance na ngai mpo na kozongisa Ye na Daniele, esika elobi: “Ayaki epai na Mokóló na Mikolo, Oyo suki na ye ezalaki mpembe lokola léni.” Nalobaki: “Nkolo, na—na—nayebi nini ya koloba te, pe nazali na mokumba yango.” Sikawa, wana ezalaki liboso bi- . . . bómikanisela, liboso Bilembo Nsambo éfungwama, pene na mobu mobimba to koleka, liboso. Nazalaki kobondela kuna: “Nkolo, ezalaki nini?”

<sup>81</sup> Natalaki, pe namonaki liboso na ngai, moto moko atelemaki, azalaki zúzi, pe alataki ekoti ya suki ya mpembe. Bazúzi ya ntango ya kala bazalaki kolata ekoti ya suki ya mpembe, mpo na kotalisa ete azalaki na bokonzi likolo na nyonso.

<sup>82</sup> Na boye, ntango namonaki Yesu ná suki ya mpembe, nalobaki ete ezali bobele kokokisa solo oyo toyebi, ete Azali na Bokonzi likolo na Nyonso. Nzambe atatalaki likambo yango moko likolo na Ngomba ya Mbongwana, pe alobaki: “Oyo azali Mwana na Ngai molingami, bóyoka Ye, Bokonzi likolo na Nyonso!”

<sup>83</sup> Na sima, kuna na ebandeli ya Bilembo Nsambo, ntango Banje nsambo yango bakitaki na lolenge ya pyramide, bazalaki wana pe bayebisaki ngai ete názonga awa mpo na koteya Bilembo Nsambo yango, ete Akozala elongo na ngai, Akotalisa ngai makambo oyo ezalaki, makambo oyo ebungaki. Nazaláká kokanisa ntango nyonso ete ekangamaki na sima ya Buku, pe ekozala eloko oyo ekomamaki na Buku te, kasi esalemaki ete eyebanaki ete Akoki kosala bongo te. Ezali eloko moko te oyo ekomami na Buku. . . Ezali eloko moko oyo ebombamaki kati na Buku. “Mpo moto nyonso akolongola Liloba moko na Yango to akobakisa liloba moko na Yango. . .” Boye ezali libombami oyo ezalaki na Buku kati na bileko nsambo ya lingomba. Moko na moko na yango ebimisaki li—libombami moko, makambo nyonso na ntina na libatishi na mai ná makambo mosusu nyonso, oyo batátábánáki na ntina na yango ntango molai.

<sup>84</sup> Na sima ntango yango emataki likolo, bitáleli ya minene, longwa kuna mosika na Californie, kino na Mexique, na Tucson, bisika nyonso, bakangaki Yango fotó. Ezalaki eloko moko ya kokamwa, kotala na miso. Ndeko Fred Sothmann kuna, oyo afandi kuna na sima, ná ngai ná Ndeko Gene Norman, tozalaki wana mpenza ntango Yango emataki likolo. Bazuaki fotó yango, kasi kino lelo bayebi ntina ya likambo yango te.

Eleki ntango moke awa, bato nyonso bazalaki koloba: “Bótala awa. Ezali lokola *boye*, ná mapapu ya Banje wana, ndenge egumbami kuna.”

<sup>85</sup> Mokolo moko, nabalolaki yango na ngámbo ya mobali, nazalaki kotala, Yesu Klisto azalaki wana mpenza lokola Hofmann ayémáká Ye. Azalaki wana, ná suki ya mpembe, akitisaki miso na nse kotálá mokili, kotálisa ete Azali na Bokonzi likolo na Nyonso. Likolo esakoli yango, Biblia esakoli yango, Nsango esakoli yango, nyonso motindo moko. Bokonzi likolo na Nyonso, ná suki ya mpembe; bozali komona mandefu na Ye ya moindo na nse. Mingi kati na bino basilí komona fotó yango. Tozali na yango kuna na sima. Bóbalola yango na ngámbo ya mobali, na pembeni, bótala yango. Ye wana, ebongi be mpenza ndenge ezalaki, soki bakangáká Ye fotó. Bazali kotala yango na ngámbo esengeli te. Bosengeli kotala yango na ngámbo esengeli. Pe bobele Nkolo Nzambe nde akoki komonisa ngámbo esengeli. Balólá yango na ngámbo ya mobali pe tala yango. Tala Ye wana, ndenge esengelaki mpenza kozala soki bakangáká yango fotó kuna.

<sup>86</sup> Mbala ya liboso namonáká Ye, Azalaki lokola *Motó ya . . . Hofmann*. Natikálá komona yango liboso te. Na mongombo ya Billy Sunday, sima na mibu ebele, namonaki yango. Kobanda wana, nazángaka fotó yango na ndako na ngai ata moke te.

<sup>87</sup> Na sima, awa na mipepe, nalobi ete, Nzambe moko oyo namonáki na emononeli awa, ezalaki ngai naino mwana moke, awa na eteyelo oyo ezali, Akokanaki na yango. Pe awa na Likolo, sima na mibu ntuku misato na misato, etatoli yango, ete ezali solo. Lolenge lokola wana nde Ye azali; ezali eloko ya mobómbamo moko boye ya likanisi ya moto moko te.

<sup>88</sup> Ndakisa na Vatican, bazali na—na—na liyemi moko ya Klisto kuna, ná mwa nzinga ya mandefu ya mpembe to nzinga ya mandefu na mbángá na Ye, molai pene na centimetre moko, ezali zonga-zonga na monoko na Ye, lokola *oyo*, pe babengi yango Klisto.

<sup>89</sup> Yango ekanisisi ngai mosali ya ntóki moko ya Greki, namonáká mokolo moko na cathédrale moko ya kala, kotalisáká ndenge Adama ná Eva bazaláki lokola; bazaláki lokola banyama to eloko moko boye. Yango nde likanisi ya bomoto ekoki komona na likambo ya molimo. Ngai nakanisi ete Adama azalaki mobali kitoko koleka nyonso oyo ezalá na bomoi, pe Eva azalaki mwasi abongi be na lolenge nyonso.

<sup>90</sup> Sikawa makanisi ya bomoto ekobongisa Likambo yango na ndenge ya makanisi na bango moko, na sima nde Nzambe akotinda pe akofungola Likambo yango na Nguya na Ye. Yango nde esalemaki mpenza awa na eleko ya Akaba.

<sup>91</sup> Sikawa, tomoni ete Eliya akokaki koloba yango, mpo Nsango ya ntango ná Liloba na Nzambe, to, motindami

yango, Nsango—Nsango, ná Liloba, ezalaki mpenza eloko moko. Mosakoli, Liloba, Nsango; motindami, Nsango, ná Nsango, ezalaki motindo moko. Yesu alobaki: “Soki Nazali kosala misala oyo ekomamaki mpo na Ngai te, na boye bódima Ngai te.” Ezali malamumu. Moto nyonso ná nsango na ye bazali moko.

<sup>92</sup> Yango wana lelo bazali kondima te likambo ya kosala misala ya Nzambe, mpo bazali koyamba Nsango ya Nzambe te. Bandimi Nsango te.

<sup>93</sup> Kasi baoyo bandimeli ntango ya Nzambe oyo tozali kobika kati na yango, makambo oyo ezali Bilei ebómbámá. Bókanisa naino, Nzambe abómbáki Yango mpenza na lolenge ete bazali kotala Yango mpenza na miso kasi bazali komona Yango te. Ndenge moko Eliya abomaki miso ya mampinga ya Siríá. Ezali ndenge moko oyo Nzambe abomi miso ya mozangi kondima, mpo na Bilei ya solosolo ya mwana, mondimi.

<sup>94</sup> Likambo oyo babengelaki Nowa “fanatik,” kotongáká masuwa, miso na ye ezalaki ya kofungwama na Liloba na Nzambe pe na elaka. Eloko mpenza oyo bango babengaki bilandalanda, nde ebikisaki Nowa ná libota na ye. Bomoni, eloko yango mpenza. Eloko oyo bato bazali kotiola, nde eloko oyo biso tozali koluka na mabondeli. Eloko oyo bato babengaka “boléma,” biso tobengaka yango “Monene!” Oyo mokili ebengaka “monene,” Nzambe abengaka yango “boléma.” Pe oyo mokili ebengaka “boléma,” Nzambe abengaka yango “Monene!” Yango ezali mpenza bokeseni kati na Malamumu ná mabe. Yesu Klisto azali motindo moko lobi, lelo pe libela.

<sup>95</sup> Bomikanisela, akendeki esika na ye ya nkúku kokokana na mwango ya Nzambe, kokokana na mbéla ya Nzambe, pe Liloba na Nzambe. Eliya akotaki na esika na ye ya nkúku kokokana na boyebi-liboso, mwango, ya Nzambe, pe mbéla ya bomoi na ye, pe kokokana na Liloba. Soki nde ndenge yango biso tokotelaki te, nayebi te ndenge nini tokómi wana.

<sup>96</sup> Pe botala, liboso bokauki ébanda, Eliya akotaki esika ya nkúku oyo, mpo na bomoi na ye. Elilingi malamumu mpenza liboso ete kosambisama ébanda kobeta mokili, Lingomba ésilá kobéngama ébima, Mwasi na libala asili koponama, pe azali bobele kozela liboso kosambisama ébeta. Asili kozeláká, azali kolia Bilei ya Nzambe, azali kosepela na mapamboli ya Nzambe. Moto nyonso oyo motó na ye ezali kosala malamumu ayebi ete tozali kokende sémba, tobélémi mpenza na ntango ya kosambisama.

<sup>97</sup> Botala! Ndeko Banks, mingi na bino bato oyo bozali awa na mpokwa oyo, bozalaki kuna, likolo na ngomba yango, na ntongo wana.

<sup>98</sup> Pe nalingi kolobela ngomba yango na ntongo ya lomingu ekoya, soki Nkolo alingi. Nazui emoniseli monene moko, likambo moko ebakisami, oyo nazali kobunda mpo na nálobela yango te na mpokwa oyo. Kasi nazali na . . . Bomoni? Pe ezali se kosalema



mbala na mbala, ntango nyonso, likambo moko sima na mosusu. Bomoni? Ekotikaláká kotika kosalema te, mpamba te ezalaki YANGO ELOBI NKOLO.

<sup>99</sup> Moko na moko na bino nyonso awa, mbala nkóto na nkóto na ba-bande, bosila koyoka ngai kotelema pe koloba: “YANGO ELOBI NKOLO, ekosalema *boye* na *boye*.” Pe ata ba-zulunále ná ba-magazine esengeli kotatola ete ezali solo. Bayebi te likambo nini nyonso wana elingi koloba, kasi bamonaki yango. Bayebi te oyo yango ezali, kasi bamonaki yango, kotatoláká ete Liloba ezali mpenza solo.

<sup>100</sup> Tozalaki ya kotelema awa na ebale, mokolo wana oyo Mwanje na Nkolo akitaki, eleki mibu ntuku misato na misato, to esalemaki na mobu 1933, akitaki pe alobaki makambo oyo Alobaki. Nabimaki, bato mingi bazalaki ya kotelema wana na libóngo, pe balobaki: “Elingaki koloba nini, Billy?”

<sup>101</sup> Nalobaki: “Ezalaki mpo na ngai te; ezalaki mpo na bino. Ngai nandimi; bino te.” Pe nakobaki nzela na ngai.

<sup>102</sup> Bongo mokengeli alobaki na ngai, alobaki: “Olingi koloba ete yo, ná boyebi ya kelasi ya école primaire, okokende na mokili mobimba kobondela mpo na ba-nkúmú, bayángeli, bakonzi pe bongo na bongo? Pe, oh,” alobaki, “bósana Yango!”

<sup>103</sup> Nakokaki kobosana Yango te, Ekomamaki na motema na ngai. Sikawa botala, sima na mibu ntuku misato na misato, nyonso oyo Alobaki ekokisami mpenza ndenge Alobaki ete Akosala yango. Azali Nzambe pe akoki kokweya te. Abatelaka ntango nyonso Liloba na Ye. Ye. . . Bótia ntembe na Yango ata moke te.

<sup>104</sup> Sikawa, botala, akotaki kokokana na mwango ya Nzambe (boyebi-liboso), mbéla ya Nzambe, pe Liloba na Nzambe, pe akotaki liboso bokauki ébanda.

Sikawa, toyebi ete kosambisama ebongisami mpo ébeta.

<sup>105</sup> Natelemaki likolo na ngomba mokolo wana, elongo na Ndeko Banks Wood oyo azali awa, tozalaki komata ngomba. Ntango mosusu nakoloba yango lisusu, mpo ékólisa kondima na bino, mpo na molongo ya mabondeli oyo elingi kosalema sima na miníti zomi to zomi na mitano. Nazalaki kotambola liboso ya Ndeko Banks. Azalaki. . . Nakanisi ete akendeke ntango Ndeko mwasi Ruby azalaki kobéla. Azalaki koya sima na ngai, namonaki ete elongi na ye ekomaki motane. Nabwakaki miso na sima. Namilobelaki ete ntango mosusu komata ngomba ezalaki mwa mpasi mpo na ye, boye nabandaki kotambola malembe. Kuna na biliki yango, ba-ngomba etelemá lolenge *wana*, esika Banje na Nkolo bamonanaki. Boye tozalaki kokende sémba na ngámbo yango, esika Bamonánáká, mwa ba-sanza liboso na yango.

<sup>106</sup> Pe wana nazalaki komata ngomba, Molimo na Nzambe. . . Ntango nabalukaki, natalaki likolo na ngomba, Alobaki: “Lokota libanga wana, pe lobá na ye: ‘YANGO ELOBI NKOLO, okomona Nkembo na Nzambe sima na ngonga moke.’”

<sup>107</sup> Nalokotaki libanga yango, pe nalobaki: “Ndeko Banks, nayebi te mpo na nini,” nabwakaki yango likolo, pe nalobaki: “YANGO ELOBI NKOLO, okomona Nkembo na Nzambe.”

Alobaki: “Ezalaki mpo na Ruby?”

<sup>108</sup> Nalobaki: “Te, nandimi te ete likambo yango etalaki yo, to moko na bino, Banks to Ruby. Nakanisi ete Elobaki bobele: ‘YANGO ELOBI NKOLO, likambo moko elingi kosalema.’”

<sup>109</sup> Na ntongo elandaki, ntango tozalaki naino kuna, mingi na mibali yango, nayebi te bato boni bazali awa sikawa, tozalaki bato zomi na mibale, to zomi na minei, zomi na mitano oyo tofandaki wana. Mbala moko, motei moko apusanaki epai na ngai pe alobaki: “Ndeko Branham,” alobaki, “nkombo na ngai *Songolo*.” Alobaki: “Nazalaki moko na babongisi mayangani na yo na Californie.”

<sup>110</sup> Nalobaki: “Nasepeli kokutana na yo, misie.” Douglas McHughes. Alobaki: “Nazali. . .” Nalobaki: “Nasepeli kokutana na yo.” Topesanaki mbote ya loboko.

<sup>111</sup> Alobaki: “Ee, sikawa, nalingi kotuna yo motuna moko.” Alobaki. . . Roy Roberson, azali moyangeli awa; Ndeko Wood, Terry ná Billy, ná, oh, Ndeko Mc Anally, pe nayebi lisusu baoyo nyonso bazalaki kuna te. Pe ngai. . . Alobaki: “Nalingi kotuna yo likambo moko.” Alobaki: “Nkolo apésaka yo pe mamónó bisika ya libanda lokola oyo?”

<sup>112</sup> Nalobaki: “Iyo, ndeko, kasi nayaka awa mwa moke mpo na kokima yango, mpo na kopéma.”

Natalaki pembeni *boye*, pe namonaki monganga moko ya monene ákotaláká ye, alobaki: “Rev. McHughes, kala mingi te, allergie oyo ezali na liso na yo ekoboma liso yango. Nasalisi yo mibu mibale, kasi nakoki kosala lisusu eloko moko te.”

Bongo nabalukaki epai na ye. Nalobaki: “Ntina otunaki ngai yango, ezali mpo monganga na yo ayebisaki yo, mokolo mosusu wana ete: ‘Ozali na allergie na liso na yo.’” Ezalaki katikati ya mokolo, pene na ngonga ya zomi na moko, pe alataki maneti ya moi. Nalobaki: “Ntina oyo; ozali kolata yango ezali mpo na moi te, ezali mpo na liso na yo. Ayebisaki yo ete ‘liso yango ekokufa.’”

Pe abandaki kolela, alobaki: “Ezali solo.”

<sup>113</sup> Nabalukaki mpo na kokende kotambola lisusu, nazalaki na páu na loboko. Pe natalaki; namonaki ye wana azali kotala ngai, na miso na ye ékongenga. Nalobaki: “Kasi YANGO ELOBI NKOLO, liso yango ekokufa te.” Nauti na bokila elongo na ye na automne eleki, akoki komona malamú koleka ngai pe koleka etonga na biso nyonso wana. Kasi ye. . .

114 Pe namonaki mobange mwasi moko kokitisa soséti-ya-molai na ye pe komatisa ngámbo ya jupe na ye. Alobaki: “Mwana na ngai, soki omoni Ndeko Branham, yebisa ye ábondela mpo na makolo na ngai.” Pe natalaki yango, pe ezalaki lokola . . . mwa ba-tumeurs na makolo na ye, zinga-zinga na yango.

115 Nalobaki: “Mama na yo azali na suki ya pembe. ‘Mwana na ngai,’ omoni. Ayebisaki yo, liboso na yo kolongwa, ete soki omoni ngai, óyebisa ngai nábondela mpo na makolo na ye. Azali lokola na mwa ba-tumeurs, bisika nyonso na makolo na ye.” Alingaki mpenza kosénzwa.

Alobaki: “Ezali ya solo.”

Nalobaki: “Yebisa ye ámitungisa te. Nyonso wana ekosila.”

116 Nabandaki kotambola zinga-zinga. Bongo nayokaki Mongongo na Nzambe koloba, elobaki: “Bólongwa wana, noki.”

Roy Roberson azalaki wana, koyéba ete azalaki mobundi-etumba-ya-kala, nasimbaki ye na lipeka, nalobaki: “Ndeko Roy, bómbama, noki-noki mpenza!”

Alobaki: “Likambo nini?”

Nalobaki: “Longwa wana! Bómbama!”

117 Pe nabandaki kotambola zinga-zinga, nakitisaki páu na ngai, nabalukaki, nalongolaki ekoti na ngai. Pe Ye wana ayáki, Nkembo na Nzambe ekitaki na ekumbaki oyo epasolaki mopanzi ya ngómba, ndenge wana, engulumaki pe eningisaki esika yango, ndenge wana, ekátáki nsóngé ya ba-nzete ya mike; pene na centimetre ntuku libwa to mokama na ntuku mibale, mokama na ntuku mitano, likolo ya motó na ngai. Emataki lisusu lokola molongósi, ndenge wana; Engulumaki lisusu. Pe, Ezóngaki, mbala misato.

118 Na sima, ntango Ekendeki, na mbala ya misato, Ndeko Banks apusanaki, alobaki: “Yango nde likambo ozalaki kolobela?”

Nalobaki: “Iyo.”

Alobaki: “Ezalaki nini?”

119 Nalobaki: “Nzambe amónanaka kati na ekumbaki.” Nayebaki te soki Alingaki náyebisa bato to te.

120 Na bongo nakendeki kobondela mwa moke. Na sima Ayebisaki ngai ete nakokaki koyebisa bango. Nalobaki: “Kosambisama nde ezali kobéta Libongo ya Westi.” Bótala yango lelo! Bótala likambo esalemaki ba-ngonga moke sima na yango: Alaska ezindaki. Pe sikawa esika yango mobimba ezali kozinda. Tozali kokota na kosambisama. Mawa esili kobwakama.

121 Kasi matondi na Nzambe, tozali na Bilei ebombámá, Bilei ya molimo, tozali kobika na bolamu pe mawa ya emoniseli ya Yesu Klisto na mikolo oyo ya suka, komitatoláká Ye moko kati na bato na Ye. Amen! Bakotaki. Eliya akotaki liboso bokauki ébanda.

Matondi Nzambe mpo na kazala na kati liboso kosambisama ébanda. sikawa nde ntango ya kobima pe kokota, kobima na bibongiseli yango pe kokota kati na Klisto, ntango ya kobima pe kokota mpo na bandimi ya solo nyonso.

<sup>122</sup> Na boye abengamaki pe atikalaki kuna na kati. Bomikanisela, atikalá kobima na mokele wana te kino Nzambe abengaki ye.

<sup>123</sup> Pe sima na bokauki kokóma pene ya kosila, Abengaki ye ábima kuna, ákende na ndako ya mwasi-mokufeli-mobali. Bótala, Abengisaki mwasi-mokufeli-mobali oyo. Pe mwasi-mokufeli-mobali oyo asangánáká na bazangi kondima te; baoyo bazuaki elembo ya nyama na ntango ya bokauki. Na bongo, Abengaki mwasi yango ábima mpo na . . . Abengaki Eliya mpo na koléisa mwasi-mokufeli-mobali oyo. Batikalaki bobele na mwa mokaté moko, mwa eloko moko moke oyo azalaki kobatela. Pe Eliya alobaki: “Liboso, pesa ngai naino yango. Mpo, YANGO ELOBI NKOLO, mbeki ya fúfú ekosila te, pe molangi ya mafuta ekokauka te, kino mokolo Nkolo Nzambe akotinda mbula likolo na mabélé.” Kotia Nzambe, liboso, Liloba na Ye liboso!

<sup>124</sup> Bótala, fúfú ezalaki kati na mbeki. Mbala nyonso azalaki kokende kozua fúfú, fúfú ezalaki kati na mbeki. Mafuta ezalaki kati na molangi, mbala nyonso azalaki kokende kozua yango. Mpo na nini? Fúfú ezalaki kotalisa Klisto, na mbeka-ya-fúfú. Ba-mbuma esengelaki kozala ya malamú mpenza, mpo nyonso énikama. Mbuma moko na moko ya fúfú yango ezalali mpenza ndenge moko, kotalisáká ete Azali motindo moko lobi, lelo pe libela. Wana ezalaki Liloba, Lipa ya Bomoi oyo elandaka nsango, mpo na kotatola Liloba.

<sup>125</sup> Ezali pe bongo lelo, baninga. Ezali pe bongo lelo, Lipa ya Bomoi oyo bana bazali kolia ezali kolanda Nsango ya Nzambe, mpo na koléisa bango na ntango ya bokauki. Ebongo soki Ázalaka elongo na biso lelo? Ebongo soki Ázalaka elongo na biso be sasaipi? Alingaki kosala makambo pe kosala mpenza ndenge Asalaki ntango Azalaki na nzoto awa na mabélé. Mwasi-na-libala azali eteni ya Mobali na libala, Lingomba ezali ndenge moko ná Klisto. “Misala mizali Ngai kosala, bino pe bokosala yango.” Pe Liloba nde esalaki yango. Ayebisaki biso ete makambo oyo Ye asalaki, biso pe tokosala yango.

<sup>126</sup> Tomoni lisusu awa ete, soki Liloba ezali kati na biso pe ekómeli biso ndenge Esalamaki na Eliya na eleko wana, Ekosala likambo moko oyo ye asalaki, akolia Biloko ya nkukú ya Nzambe, oyo ebómbámaki epai na mokili. Oh! Lisusu, yango ezali kokomisa Nsango ná motindami eloko moko. Bilei ya molimo ebongisami, pe Ezali sikawa na eleko yango. Pe moko na moko na bino akoki kozala na Bilei oyo soki olingi Yango, soki bondimi kokabwana na kozanga kondima nyonso ya ngonga

oyo, soki bobelemi mpo na kokota kati na Klisto, kokota kati na elaka na Ye.

Pe bómikanisela bilaka na Ye, na Malaki 4, na Luka 17:30, pe na Yoane 14:12, pe Makomi mosusu mingi, oyo balobeli, Yoale 2:38, pe nyonso oyo Akosala, to, kutu 2:28, makambo Akosala na mikolo oyo ya suka. Pe ndenge mosakoli alobaki ete Pole ekozala na mikolo oyo ya suka, ndenge Ekosalema, makambo Ekosala, Makomi nyonso oyo ezali kolobela mikolo oyo ya suka. Pe yango ezali Klisto! Soki okoki komibomba kati na Yango sikawa, na Esika ya nkukú wana, okoki kolia pe komona bolamu pe mawa ya Nzambe. Soki ozali na bokono, kobikisama ezali wana.

<sup>127</sup> Bomikanisela ntango Elisa, sima na mwa ntango, akitisaki. . .Sima na ye kozala na mbeka-ya-fúfú, Klisto, aleisaki pe ndako ya mwasi-mokufeli-mobali na Yango. Botala, sima na mwa ntango, ntango akitisaki móto longwa na likolo, pe nyonso wana, atalisaki kotindama na ye na Nzambe, Molimo ya mosakoli.

<sup>128</sup> Botala, kati na biliki, ntango aláláki kuna na nse ya nzete ya letáma, Mwanje moko akitaki ná lolenge yango moko ya fúfú, alambaki mokáté pe aleisaki ye. Pe sima na mwa ntango moke, Alalisaki ye lisusu mpongi, pe alamusaki ye, azalaki na mwa mikáté koleka elambami mpo na ye. Pe na makasi azuaki na mikáté yango, atámbolaki mikolo ntuku minei. Nkembo na Nzambe! Azali motindo moko lobi, lelo pe libela. Oh, ndenge tolingaka Ye, Bilei ya molimo na eleko na Yango!

<sup>129</sup> “Ezali malamú te kozua lipa ya bana pe kopesa yango na ba-mbwa.” Yesu alobaki likambo yango moko te na mwasi mo-Sulapoinika? Atindamaki epai na baoyo ya Ye. Ezali solo. Pe na baoyo nde Ayaki. . .Akendeki epai na bato na Mabota ata moke te.

<sup>130</sup> Pe sikawa, lelo, Ayei kotala bato na Mabota na eleko na bango, pe ezali malamú te. . .

<sup>131</sup> Okoloba: “Mpo na nini ete Nsango yango ekei na bisika minene oyo te, na mayangani minene oyo, lokola kati na bibongiseli?”

<sup>132</sup> Ezali Bilei na bango te. Ezali Bilei ya lingomba te, ndenge ebengamaka. Ezali Bilei ya Mwasi-na-libala. Ezali Bilei ya molimo na ntango. Ekopesa bango mpasi na libumu. Ezali na vitamíne mingi koleka mpo na bango. Bomoni? Bomoni? Bo—bo—bokokoka kosala yango te. Kasi, mpo na bana, Ezali Lipa, Ezali Bomoi, Ezali Yesu Klisto, motindo moko lobi, lelo pe libela.

<sup>133</sup> Ntango ekoleka mingi soki tobandi molongo ya mabondeli sikawa te, na bongo tógumba mitó mwa moke.

<sup>134</sup> Nzambe molingami, Bilei na ntango elongobani, Bilei ya molimo. Likambo oyo mokili eyebi eloko moko te. Koyoka ndenge Nkolo na biso koloba na mpokwa wana, to mokolo

wana kuna na Samalia, esika yango moko oyo Elisa akomaki pe alobaki: “Ee, mamwe ekokweya te soki nabengisi yango te.” Tala Yesu atelemaki wana koyebisáká bayekoli na Ye.

Balobaki: “Molakisi, mpo na nini Olei te?”

Alobaki: “Nazali na Bilei oyo bino boyebi te.”

<sup>135</sup> Ya solo, Nkolo, Bilei na Ye ezalaki kosala mokano ya Nzambe, komona misala na Nzambe kokokisama na ntango na Ye. Azalaki wana mpo na komona ete esalemi. “Nasalaka eloko moko te, soki Tata na Ngai alakisi Ngai yango te liboso. Oyo Tata alakisaka Ngai, Nasalaka yango.”

<sup>136</sup> Pe, Tata, ezali pe bongo lelo. Lingomba, mondimi ya solo, Nzoto ya bandimi, ezui nzela ya kozwa Bilei, Bilei ya molimo, oyo bato ya bibongiseli bayebi eloko moko te oyo etali yango. Mokili eyebi eloko moko te na Bilei oyo, Tata. Kasi Lingomba na Yo, libota na Yo, Mwasi-na-libala ya Mwana na Yo alingaka Yango.

<sup>137</sup> Tozwi nzela ya kozwa lobiko ya nzoto na biso, na ntango minganga bakoki te. Tozwi nzela ya kozwa yango. Ezali moko na Bilei ya Nzambe, oyo Ye apesaki Lingomba na Ye, pe alakaki yango na mikolo ya suka epai ya bana na Ye bandimi. Tata, sunga biso mpo na kozala bana oyo bandimi, mpo nyonso ekoki kosalema mpo na bandimi. Kokisa yango, Nzambe Molingami. Tosengi yango na Nkombo na Yesu. Amen.

<sup>138</sup> Nakanisi ete Billy ayebisaki ngai ete bakabolaki ba-kalati ya mabondeli. Soki moto moko akoki koyebisa ngai lettre oyo ezali na kalati ya mabondeli, yango nde nyonso nalingi koyeba. [Moto moko alobi: “C.”—N.D.E.] C, malam, tózua C, moko, mpo na kobanda, kobanda kosala molongo na biso. Bomoni, sikawa, bakoki kozala bisika nyonso. Sikawa, soki bato nyonso. . . Ee, bomoni, nakomeka kosala boye. Nayebi te soki tokoki kosala yango to te. To, pe, tokoki kosala molongo ya kobenga bato; bófanda kimia. Ezali likambo moko te, mpo na ngai. Soki bokoki koya awa na etumbelo, to kobenga na molongo, nyonso mibale ezali mpenza mabe te. Nazali kotalela bobele Molimo Mosantu. Nazali kotalela Ye mpo na kolóngisa Liloba oyo nauti koteya.

<sup>139</sup> Ndeko George Wright, nandimi Yango. Uta bolenge na ngai, nazalaki koya na ndako na yo, eleki mibu mingi, koyoka ndeke wana, engoulevent, na nzete, nazali kokoba kondima Nsango moko yango. Nandimi ete Ezali motindo moko.

<sup>140</sup> Malam, namoni ete bazali kopesa nzela awa sima mpo na molongo ya mabondeli. Malam, káláti ya mabondeli C, motángo ya liboso, mibale, misato, minei, mitano, bóya naino kotelema awa. Soki okoki kotelema te, tómbóla bobele mabóko, bamosusu kati na bango bakoya komema yo. [Moto moko asololi na Ndeko Branham—N.D.E.] Ézali nini? Iyo. Ah-ah Káláti ya mabondeli C, moko, mibale, misato, minei, mitano. Pe sikawa botala, bino baoyo bozali na káláti ya mabondeli te. . .

141 Sikawa, nasálá molongo ya mabondeli ya boye kálá, kálá mpenza. Bato boni bazali koyeba lisusu etinda na ngai, ntango totongaki Mongombo oyo? Alobaki: “Sálá mosala ya mopalanganisi-nsango-malamu.” Alobaki te ete nazalaki mopalanganisi-nsango-malamu. Alobaki: “Sala mosala ya mopalanganisi-nsango-malamu,” bomoni, “mpo ntango moko ekoya, wana yango ekobongwana.” Ngonga yango ezali koya. Malamu. Sikawa, kati na yango, Ye . . .

142 Okoki kosangisa misala-ya-koteya mibale to misato ekeseni te, kozala mokengeli pe kopalanganisa nsango-malamu, mbala moko. Okoki kozala te mo—mosakoli pe, ntango mosusu, mokengeli, mbala moko, bomoni, mpo bozali na misala ya kokesana, mosala-ya-koteya ya kokesana.

143 Kasi Nkolo apesaki ngai makambo nasengelaki kosala na Nsango na ngai. Kasi, na sima, Alobaki: “Sala mosala ya mopalanganisi-nsango-malamu, kokisa mpenza mosala-ya-koteya na yo malamu, mpo ntango moko ekoya, wana ekoyokaka bato Mateyo na sembo te.” Yango mpenza nde esili kokóma sikawa! Bibongiseli nyonso ya mangomba eboyi ngai. Baboyi koyoka Mateyo ya sembo. “Kasi, mpo na konyomitisa matoi na bango, bakoyanganisa balakisi kobila mposa na bango mpenza, pe bakobongwa koyoka masepe na mpamba. Pe bakosala makambo minene ya kokamwa, lokola Yambele ná Yane, baoyo batelemelaki Mose, kasi boléma na bango ekozala polele epai na bato nyonso.” Bomoni? Bomoni? Malamu, bomekoli! Bomoni, lokola Yambele . . .

144 Pe, Nzambe na Likolo ayebi, ete ezali wana mpenza kati na libanga . . . (ya Mongombo wana) . . . ya litumu utá mobu 1933, ekomámá na lokasa ya Biblia, ezali mpenza kuna. Botala lolenge basalaki yango. Botala makambo esalemaki. Bomekoli, yango mpenza. Alobaki: “Bótika bango, boléma na bango ekozala epai na bato nyonso pelamoko na Yambele ná Yane.” Tálá tokómi na mokolo yango.

145 Namonaki losambo na eleko wana, ntango tozalaki kotia libanga ya litúmu, bato bayekemeki na maninisa pe bisika nyonso, batelemaki pembeni na bitutú ya mongombo. Yango mpenza. Bato balobaki, ntango esalemaki, bato ya engumba oyo, balobaki: “Na kati ya sanza motoba . . .” Bisó tozalaki bobele na dollar moko na centime ntuku mwambe mpo na kotonga mongombo, babongisi-mituka mingi basilaki kozua mokano ete ekokóma esika na bango ya kobongisa mituka. Kasi, kino lelo, ezali lopango-ya-mpate mpo na Bampate ya Nzambe.

146 Moko, mibale, misato, mitano, motóba, nsambo, mwambe, libwa, zómi. C, motóba, nsambo, mwambe, libwa, zómi. Malamu.

147 Sikawa, “Ngai Yawe nalonaki yango, Nakomwangisela yango mai butu pe moi mpo moto moko te ábotola yango na loboko na Ngai.” Botala matóngi! Ebongiseli ata moko te mpo

na kosunga Yango. Lingomba ata moko te lokola Yango na ekólo oyo mobimba. Pantekote ata moko te na ekólo mobimba, eloko moko te mpo na kosunga Yango. Bango nyonso batelemelaki libatisi na mai, bango nyonso batelemelaki makambo mosusu nyonso yango. Ata na libota na ngai moko, papá na ngai moko abenganaki ngai na ndako, natiáki bilamba na ngai na mwa sáki moko ya papier pe nakendeki kofanda na New Albany. Ya solo.

Kasi na nzela ya makámá, minioko pe mitámbo  
mingi,  
Nasilaki koleka;  
Ngolu nde ebateli ngai mosika boye,

Nakómi na mibu ntuku mitano na motoba, pe etikali moke nákatisa ebale.

Ngolu ekokoba komema ngai.  
Ntango nakozala kuna mibu nkóto zomi,  
Kongenga makasi lokola moi;  
Tokozanga te koyemba masanzoli ya Nzambe  
Koleka mikolo ya ebandeli.

Oh, ndenge nalingi Yesu! Azali nyonso mpo na ngai!

<sup>148</sup> Oh, malamú, bato boni. . . Nasukaki wapi, zómi? Tokoki kobakisa bamosusu? Malamú. Tokómaki wapi, zomi, zomi na mitano? Malamú. C, zomi kino zomi na mitano, ata ozali wapi, soki okoki kotelema pe kokóta na molongo. Olobi nini? Ah? Malamú. C, zomi na mitano kino ntuku mibale, na sima. Ézala C, zomi na mitano kino ntuku mibale. Bato zomi nde babakisami. Tomoni. . . Bomoni—bomoni kuna, esika molongo yango ezali, tolingi te ete—ete bato bákangama ya koleka. Pe toko. . . Malamú.

<sup>149</sup> Sikawa bólanda ngai na bokebi nyonso mpenza; tokoumela te. Kasi, sikawa, oh, ngonga nini boye, ntango nini boye! Na—nakosepela ete moto nyonso ákoka kolinga Nkolo. Na—nakosepela ete biso nyonso tókoka kokóma esika wana ya kososola makoki ya miníti oyo. Tómeke yango. Bólanda ngai na bokebi mpenza.

<sup>150</sup> Likambo nini—likambo nini tozali koluka kosala awa? Tozali kolekisa Liloba na Nzambe na momékano. Eliya pe asalaki ndenge moko, amataki likolo na ngomba, sima na ye koyeba ete atindamaki na Nzambe mpo na kosala yango. Alobaki: “Sikawa tótalisa polele nani azali Nzambe, tika Nzambe oyo akoyanola na móto ázala Nzambe.”

<sup>151</sup> Pe bapakanó bazalaki komikata-kata, oh, koloba: “Ee, na ntembe te. . .” Ba—bapakanó bayebaki ete móto ekokita te, na bongo bazalaki kogánga pe kobélela.

<sup>152</sup> Kasi Eliya ayebaki ete ekokita, mpamba te azaláki na emononeli longwa na Nkolo.

Okoloba: “Azaláki na emononeli?”



153 Iyo, misie! Ntango asilaki kobongisa makambo nyonso, alobaki: “Nkolo, nasali nyonso oyo kokokana na etinda na Yo.” Na sima móto ebandaki kokita. Soki Liloba na Nzambe etósami na mobimba, na ntango wana ezali likambo na Nzambe mpo na kotálela makambo etikali. Asengi na yo bobele ete ótiya yango wana. Pe óndimisama ete obéngámi mpo na kotiya yango wana. Bomoni? Soki yo nde, Akotalela makambo etikali.

154 Sikawa, awa ekozala mpo na bato bakoleka na molongo oyo nakobondela mpo na bango. . . Sikawa, ee, bokómi mpenza kino pembeni na etutú, malamú, mpo na kobanda molongo yango. Sikawa, liboso, esika moko boye awa kati na ndako, ezali ntango mosusu na bato. . .

Bato boni awa bazali na bokono kasi bazangi kalati ya mabondeli, bótombola loboko. Bomoni, bisika nyonso. Sikawa, boyebi ete soki Nkolo na biso. . . Pe nandimi ete Akosala, soki Azali motindo moko lobi, lelo pe libela. Asalaki milongo ya mabondeli. Bato bayaki epai na Ye na milongo milai, ebélé na bato, Azalaki komama bango, kopambola bango. Na sima, Atelemaki mwa moke pe Alobaki: “Nani asimbi Ngai?” Atambuisaki miso, Ayebisaki mwasi moko ntina nini asimbaki Ye; Alobaki ete kotanga ya makila na ye esilaki, kondima na ye ebikisaki ye.

155 Bongo soki abalukaki pe alobaki: “Ee, nayebi te, Nkolo, naumeli na yango ntango molai?” Elingaki kosalema te. Te, elingaki kosalema te. Te.

156 Bongo soki Alobaki na mwasi mo-Sulapoinika: “Mpo na liloba oyo olobi, mwana na yo ya mwasi, molimo mabe asili kobima kati na ye,” bongo soki alobaki: “Ee, sikawa, Nkolo, na—nalingaki ete Yo ósala yango *boye*”? Mo—molimo mabe yango alingaki kokóba kozala kati na mwana mwasi yango. Kasi atiaki elikia ete akokuta mwana na ye ndenge Alobaki ete akokuta ye.

157 Sikawa, Alobaki na biso: “Soki okoki kondima! Soki okoki koloba na ngomba oyo: ‘Longwa wana’, pe otii ntembe na motema na yo te, kasi ondimi ete likambo olobaki ekokokisama, okoki kozua yango. Ntango obondeli, ndima ete ozui yango, ekopesamela yo.” Oyo nde elaka!

158 Sikawa, moto oyo ateyaka nsango malamú ya kosepelisa bato andimaka yango ata moke te. Akoya teee na ekuke, akotala na kati, to akotelema wana, pe akoloba: “Ee, ezali etóngá mosusu ya batúntuki”, pe akei na ye. Bomoni? Kasi ayebi te ete oyo nde Bilei ebombámá. Ayebi te ete oyo nde Eloko ya nkukú, oyo ebombámeli ye. Ayebi yango te. Ezali—ezali—ezali mawa, likanisi oyo ezali bolumbu, ya mawa pe ekúfá miso, kasi eyebi yango te. Bomoni? Wana ezali eloko moko mabe.

159 E Nzambe, tika ata nákufa na ngai liboso, kasi kotika ngai te kokoma ndenge wana. Malamú nákufa (iyo, misie), na esika ya

kosala yango. Nabanzi moko na moko na biso akolinga bongo, boye te? [Losambo balobi: “Amen.”—N.D.E.]

<sup>160</sup> Kasi sikawa, Nzambe alakaki biso makambo oyo na mikolo ya suka. Na Malaki 4, ekomami ete Yesu Klisto akokita pe akomitalisa Ye moko kati na nzoto ya moto, ndenge Asalaki na Sodoma. Ezali solo. Pe elobami ete mokili ekozala na lolenge ya Sodoma. Pe elobami ete: “Ndenge esalamaki na ntango wana, Mwana na moto akomonisama mokolo yango.” Bomoni, Moto oyo akitaki na lolenge ya moto, oyo ezalaki “Elohim”, mpo na Abraham, liboso na koya ya mwana na elaka. Botala oyo esalemaki, Abraham alobaki ete ezalaki Nzambe. Pe Biblia elobi ete bato misato bayaki epai na ye, ná putulú na bilamba na bango, kati na mobembo, bafandaki pe baliaki lokola bato. Pe Yesu alobaki: “Bobebe ntango oyo mokili ekokóma na lolenge ya Sodoma, boye Mwana na moto akomimonisa Ye moko lisusu,” Mwana na Nzambe te. Mwana na moto, bomoni, Akomimonisa Ye moko.

<sup>161</sup> Sikawa bókokanisa yango na oyo mosakoli ya suka alobaki: “Tálá, Nakotindela bino Eliya mosakoli, pe akozóngisa mi—mitema ya bana epai ya batata.” Bomoni? Nsango moko mpo na kozóngisa bango na Biblia, pe Mwana na moto akomimonisa Ye moko na mokolo wana. Pe na mokolo yango ya koyula na eleko ya lingomba ya suka, mwanje na nsambo, mabombami ya Nzambe ekoyebana na mokolo yango. Bilembo Nsambo ekofungwama. Mabombami ya mangomba oyo nyonso pe makambo nyonso, ndenge esalemaki, pe nini esalem- . . . lolenge nini, likambo nini esalemaki.

<sup>162</sup> Bomoni, bayebi Yango te. Yesu alobaki: “Bino Bafalisai, bakufi miso!” Alobaki: “Soki mokufi miso azali kokamba mokufi miso, bango mibale bakokweya na libulu, boye te?” Bomoni, ntina wana nde bato yango bazali komona Yango te.

<sup>163</sup> Libombami na Yango, Bilembo wana, ezali ete moko na moko na mangomba yango, esalaki ebongiseli pe ekotaki kati na yango, pe yango nde moko na makambo ya sekelé, oyo ezalaki mabe na miso ya Nzambe. Bomoni yango, Docteur Lee? Bomoni, botala. Ezali yango. Wana nde likambo mpenza. Wana nde moko na basekéle yango. Bakómaki ebongiseli pe, bomoni, bazalaki mpenza libanda na mokano ya Nzambe. Likambo yango ekotalisama polele na mikolo ya suka, pe ekomema bato, na endimeli to na ebongiseli te, kasi ekozongisa bango na Liloba ya solo. Pe Liloba ya solo ekoya epai na etóngá moko ya bato, pe Mwana na moto akomimonisa Ye moko kati na bango, “motindo moko lobi, lelo pe libela.”

<sup>164</sup> Oh! la la! Oh, nalingi yango. Nalingaka—nalingaka kokumisa Ye mingi. Nalingaka ko—kokómisa Ye monene liboso na bato. Nasengeli kokómisa Ye monene te; Asilá kozala na Ye monene. Azali likolo mpenza okoki koleka likolo na Ye te, azali

na bozindo mpenza okoki koleka na nse na Ye te, azali monene mpenza okoki kozunguluka Ye te, kasi ata bongo ozali na esika kati na motema na bino mpo na Ye. Bokolinga koyamba Ye, boye te? Nkolo na biso azali malamumu mingi! Malamumu.

<sup>165</sup> Sikawa tófanda mpenza kimia, biso nyonso. Sikawa, tolobelaki Likambo oyo. Sikawa likambo ezali été, Yango ezali ya solo? Sikawa, ekoki kozala na bapaya awa ntango mosusu. Nakoki koloba, soki . . . na bino, soki Klisto azali motindo moko lobi, lelo pe libela, Alingaki kosala nini na miníti oyo? Alingaki kosala makambo moko oyo Asaláká ntango Azalaki awa liboso. Ezali solo? Kondima ya bato elingaki kosimba elamba na Ye, pe Alingaki kobaluka. Ndenge Asalaki mpo na mwasi wana na libulu ya mai, pe ndenge Asalaki bisika mosusu, pe Azalaki koyeba makanisi na bango.

Sikawa, okoloba: “Akoki kobikisa ngai?”

<sup>166</sup> Liloba na Ye elobi ete Asílá kosala yango. Kasi likambo ezali ete, esengeli na Ye moko komitalisa, ete Azali awa.

<sup>167</sup> Sikawa, soki Amonani na biso awa na nzoto ya mosuni, kokokana mpenza na *Moto ya Klisto na mibu Ntuku misato na misato* ya Hofmann, ná makila ezali kotanga na loboko na Ye, pe bongo na bongo, ná bilembo ya nsete na nzoto na Ye, ngai nakondima yango te. Te, te. Te, te. Ntango akoya, Ye moko: “Miso nyonso ekomona Ye, ndémo nyonso ekotatola Ye; pe lokola moi ebimaka na Esti kino na Westi, ekosalema pe ndenge wana.” Bomoni? Biso tondimaka binzambinzambi ná bitónge wana te. Tondimaka ete Nzambe azali Liloba.

<sup>168</sup> Kasi Alati nzoto Ye moko, azui nzoto na yo pe nzoto na ngai, pe apesi yo makabo, apesi ngai makabo, pe na nzela ya makabo yango Azali komitalisa Ye moko. Yango nde bilei ya nkúkú. Ata Amitalisi Ye moko na nzela na ngai ndenge nini, osengeli kondima Yango, pe osengeli kozala pe na likabo ya kondima, mpo na kondima Yango. Bondimi yango? [Losambo balobi: “Amen.”—N.D.E.] Pe sikawa, soki Akomitalisa Ye moko na lolenge yango, bokondima Ye? [“Amen.”] Na motema na bino mobimba, bokondima Ye? Oh, ezali malamumu mpenza, nazali bobele kozela Ye, nazali bobele kozela komona likambo nini Akoloba.

<sup>169</sup> Tala mobali moko ateleme awa. Namóná ye naino te na bomoi na ngai, na boyebi na ngai. Emonani lokola azali moto malamumu, makasi pe na nzoto kolongonu, pe ntango mosusu azali bongo, na—na—nayebe te. Kasi ateleme wana. Sikawa, nakoki kokende kotia maboko likolo na moto yango pe kobondela mpo na ye, kotuna ye soki akondima. Akoki kotelema awa pe koyebisa ngai, ete: “Na—na—nalingi été óbondela mpo na *Songolo-pakala*. Pe nazali—nazali na likáká ekómi pápálá. Nayókaka motó mpasi, ntango nyonso. Nazali na mpota na likundú na ngai”,

to eloko moko bongo. Ye—ye, nayebi te. Akoki koloba moko na makambo wana.

170 Ngai nakoloba: “Malamu, misie, ndeko. Nakotia maboko likolo na yo pe nakobondela mpo na yo.” Ekozala mpenza malamumu mingi. Yango mpenza nde makambo tosalaki, ntango nyonso na eleko. Ezali solo?

171 Kasi, bomikanisela, Yesu alobaki été ekozala ndenge mosusu mpenza na ntango ya Boyei na Ye, ekozala ndenge ezalaki na mikolo ya Sodoma. Pe Moto oyo ayaki kuna, Apesaki mokongo na hema, epai Sálá azalaki, pe Alobaki (“Abram” te, sikawa) “Abraham.”

172 Bomoni, azalaki Abram, mokolo eutaki koleka. Kasi azuaki emononeli, pe Nkolo ayebisaki ye ete: “Nakobongola nkombo na yo.”

173 Pe tálá awa, Nkolo Ye moko, na lolenge ya moto, azali kolia pe komela elongo na ye. Alobaki: “Abraham, wapi mwasi na yo Sarah?” S-a-r . . . r-a-h; kasi S-a-r-r-a te.

Alobaki: “Azali kati na hema, na sima na Yo.”

174 Alobaki: “Nakoya kotala yo, kokokana na elaka na Ngai eleki mibu ntúkú mibale na mitano.”

175 Pe Sarah asekaki mwa moke kati na ye moko. Alobaki: “Sarah asekaki kati na hema se na ngonga wana, koloba: ‘Makambo oyo ekosalema ndenge nini?’” Ah. “Ezali na likambo moko oyo eleki nguya mpo na Yawe?” Bomoni? Eloko moko te. Te, misie.

176 Sikawa Alobaki, Yesu alakaki ete: “Ye, Mwana na moto,” oyo ezali Liloba (bondimi yango?), “akoya na mikolo ya suka pe akomimonisa Ye moko, na eleko oyo mokili ekokóma lokola Sodoma ná Gomora.” Bondimi ete ezali solo?

177 Liboso tóbondela libondeli moko, bamosusu kati na bino kuna, bóbondela pe bótala soki Mwana na moto akobi kozala motindo moko lobi, lelo pe libela. Bótuna bobele soki Ye azali, bóloba: “Nkolo, moto yango ayebi ngai te, kasi nayebi ete Ozali motindo moko lobi, lelo pe libela,” bótala soki Akoyebisa bino yango.

Iyo, misie. Sikawa bótombola motó mwa moke.

178 Ezali sima na ngai. Azali mwana moke. Azali na móto makasi ya fièvre sikawa. Azali mwana moke ya mwasi. Bouti libanda na engumba oyo. Mwana yango azali na mpasi na líkundú. Azalaki yango. Ndimá kaka.

179 Sikawa, nde yango likambo Alobaki ete Akosala? Namóná naino moto yango na bomoi na ngai te. Nzambe, na Lola, ayebi yango.

180 Moto oyo, azali komonana ete azali makasi mpenza ná nzoto kolongonu. Kasi bozali komona elilingi wana likolo na ye kuna?

Elingi koloba, soki Nzambe asungi ye te, atikali lisusu na ntango molai awa te. Azali na cancer. Ezali na poumon na yo.

Sikawa, Mwana na moto azali awa.

Azali na mokumba na motema na ye mpo na mwana mobali moko ya moke, mwana moko ya moke. Ezali solo? Ondimi ete Nzambe akoki koyebisa ngai mpasi ya mwana yango? [Ndeko mobali alobi: “Nayebi ete Akoki.”—N.D.E.] Akoki. Mwa kotuntuka moko ekangaka ye, lolenge moko ya maládi ya ndeke. Auti kosala yango kala mingi te. [“Na ntongo ya lelo.”] Ezali solo, na ntongo ya lelo. Ondimi ete okozala na bomoi mpo na kobókolo mwana yango, pe akoyoka malamumu? [“Iyo.”]

<sup>181</sup> Charlie Cox azali wapi? Azali wapi? Charlie, ozali wapi? Nakanisaki ete azali awa na mpokwa oyo. Awa, Charlie. Gary, ozali wapi? Larry, azali awa? Mwana na ye ya moke ya mobali azalaki na likambo ya ndenge moko, ndenge moko mpenza. Ozali wapi, Larry? Yaka naino awa. Ee, yo oyo. Mwa mwana mobali oyo azalaki na likambo ya ndenge moko. Tata ná mama na ye bazali mpenza baninga na ngai ya malamumu. Eleki mibu mingi, nazalaki kuna, pe mwana mobali oyo, azalaki kotuntuka, akobungisa mayele pe koyeba eloko moko te. Ezalaki maládi ya ndeke. Nasosolaki yango na mwana oyo, naséngaki na Nzambe ábikisa ye. Esálá ye lisusu ata moke te kobanda wana. Oyo nde tata na ye; mama na ye afandi awa esika moko boye; pe mwana mobali moke yango ye oyo, ye moko.

<sup>182</sup> Sikawa ondimi, misie? (Natondi yo, Larry.) Ondimi, misie? Tika ete Nzambe ya Lola ákokisela yo likambo yango moko, pe ózala na bomoi mpo na kobókolo mwana yango. Nzambe ápambola bino.

Tóbondela.

<sup>183</sup> Nzambe molingami, sunga ye. Nabondeli ete mawa pe ngolu na Yo ézala likolo na ye pe ópambola ye. Na Nkombo na Yesu.

<sup>184</sup> Zóngá na Louisiana sikawa, na esengo, pésá nkembo na Nzambe mpo na ye.

<sup>185</sup> Oh, iyo, autaki na Louisiana, na ntembe te, na ngámbo ya Laki Charles. Ya solo. Bomoni, nakoki kososola makanisi na bino sikawa. Nzambe ákumisama!

<sup>186</sup> Ee, ozali kosenga eloko ya—ya malamumu, ozali na mposa ya kozala na mwana. Osílá kozala na bana, bana mibale to misato, kasi ozali na mposa ya moko lisusu. Tika ete Nzambe ya Lola ápesa yo yango, ndeko na ngai ya mwasi. Yaka awa, nalingi kotiela yo maboko.

<sup>187</sup> Nzambe molingami, pésá mwasi oyo mposa ya motema na ye, mpo ezali ntina moko malamumu. Na Nkombo na Yesu. Amen.

Sikawa kende kozua mwana yango.

<sup>188</sup> Nzambe azali Nzambe moko malamu. Bondimi yango? [Losambo balobi: “Amen.”—N.D.E.] Ayebi nyonso oyo tozali na bosenga na yango. Akokisaka bosenga na biso nyonso, soki tondimi yango. Alobaki: “Soki okoki kondima!”

<sup>189</sup> Napesaki yo mbote ya loboko esika moko boye. Nayebi lisusu te soki ezalaki wapi, kasi esika moko boye, napesaki yo mbote ya loboko. Nazali koyeba lisusu mpenza te, kasi tozalaki na esika moko, lelo, na esika moko, kasi nayebi esika yango ezalaki te. Kasi ezali wana te, tozali awa mpo na kolobela yango te. Oyei awa mpo na kolobela, to mpo na kobondela, olingi ete nábondela mpo na moto mosusu. Ezali solo. Azali awa te. Azali na Géorgie, azali kobéla. Azali bobele kobéla na nzoto te, kasi na molimo azali kobéla; ndeko na yo ya libóta. Ondimi ete Nzambe akotalela likambo yango, mpo yo ozali awa mpo na ye? Ondimi yango? Yaka awa pe tóbondela elongo.

<sup>190</sup> Nzambe molingami, pésa mobali oyo mposa ya motema na ye, mpo ákoka kozonga pe ákuta mobali yango koleláká epai na Nzambe. Na Nkombo na Yesu nasengi yango. Amen.

Nzambe ápambola yo. Kotia ntembe te. Ndimba na motema na yo mobimba.

<sup>191</sup> Nsango boni? Ezali te ete nasembolaki loboko te mpo na kopesa yo mbote, ntango osembolaki loboko na yo, nazalaki kotala eloko moko. Ezalaki elilingi, ya molili makasi pe moindo. Yango nde ntina. Nayebi ete soki nazuaki loboko na yo, nalingaki koyeba yango na lolenge wana, omoni. Kasi ezali cancer. Ondimi ete Nzambe azali na makoki ya kolongola yango? Ezali na ntólo na yo, na ngámbo ya mwasi. Olingi kozonga na Caroline pe kopesa nkembo na Nkolo mpo na kobikisama na yo, boye te? Ososoli likambo nalingi koloba? Tóbondela.

<sup>192</sup> Nzambe molingami, na Nkombo na Yesu Klisto, Ye Oyo azali awa sikawa; wana bana bazali kolia Lipa ya Nzambe, tika ete mwana oyo pe ázua mbano ya kondima, Lipa ya Nzambe oyo Apesi ye sikawa mpo na kobikisama na ye. Tika ete ázonga pe ábika, na Nkombo na Yesu. Amen.

Nzambe ápambola yo, ndeko. Ndimba na motema na yo mobimba.

Nsango boni?

<sup>193</sup> Ezali ntango moko kitoko mpenza, boye te? Ezali lokola ete bato basimbami na limemia moko monene. To, ezali koyokana lokola, ntango mosusu na matoi na ngai, ezali lokola eloko moko ezali kosala: “Wuuuhh!” Ezali kosala makelele lokola: “Wuuuhh,” ndenge wana, bomoni. Ezali Lipa ya bana. Bomoni? Ezali ya bino. Ezali mpo na bino. Ezali mpo na ngai te; Ezali mpo na bino. Nazongisi matondi mingi, ete sika-sikawa, ngai. . . nazali mpenza malamumu, na boyebi na ngai; kasi Ezali Lipa mpo na ngai pe, ntango nazalaka na bosenga na yango. Ezali Lipa

mpo na bino. Ezali kopesa mpiko. Mpo na bino baoyo bozali ata na bokono te, yango ememaka mitema na biso liboso na Nzambe.

<sup>194</sup> Likambo oyo ezali mpenza na eleko likambo Alobaki ete Akosala: “Pe ndenge esalemaki na mikolo ya Sodoma, ekosalema pe bongo na boyei ya Mwana na moto, ntango Mwana na moto akomonisama.” Bomoni? “Pe, tala, Nakotindela bino Eliya mosakoli, liboso na mokolo monene pe ya nsómo ya Nkolo. Akozongisa mitema ya bato epai na Tata.” Bomoni? Bomoni?

<sup>195</sup> “Na sima bayengebene bakonyata ba—bato mabe na nse, bakozala mputulu.” Bakozika lokola litumbú ya móto, bomoni, mabelé nde ekozika. Tomoni yango, ekobebisama kuna. Pe bawolcan ekobwaka móto na mabelé, pe likolo ekopela móto.

E Libanga na Bileko, yokela ngai mawa sikawa, pe na ntango wana.

<sup>196</sup> Nsango boni? Ee, likambo ya liboso, ozali na mpasi ya basi, bokono ya basi. Ozali na makambo mosusu. Ozali na motema likolo-likolo, ezali mobu yango ya kokoma na motema likolo-likolo. Mikakatano ya ndenge na ndenge. Kasi ozali pe na mposa moko, ezali ya kozua Molimo Mosantu. Ezali solo. Nde oyo yango ezali. Ondimi ete ozali . . . Osili koyambola makambo nyonso? Ondimi ete, soki natieli yo maboko pe nasengi Nzambe kosala yango, Molimo Mosantu ekoya? [Ndeko mwasi alobi: “Iyo.”—N.D.E.] Ondimi yango? [“Iyo, misie.”] Tóbondela.

<sup>197</sup> Nzambe molingami, natii maboko na ngai likolo na mwasi oyo, na lolenge ya bantoma, pe nasengi ete ázua libatizi ya Molimo Mosantu. Na Nkombo na Yesu Klisto, tika ete ázua Yango. Amen.

<sup>198</sup> Kotia ntembe na yango te. Ezali mpo na yo, omoni. Ezali ya yo. Ezali Lipa ya—ya bana.

<sup>199</sup> Omiyokaki moke ndenge mosusu ntango nalobaki “bokono ya basi”, boye te? Mpo yango nde ozalaki na yango, pe. Sikawa ondimi ete okokóma malamú sika-sikawa? Kende, kóba kopesa matóndi na Nkolo.

<sup>200</sup> Nsango boni? Ondimi na motema na yo mobimba? Ondimi ete okozua makoki ya kolia ndenge ozaláká kolia kálá? Malamú. Kende, pe loba: “Natondi Yo, Nkolo. Nandimi yango.” Bozali ya Nkolo.

<sup>201</sup> Ondimi ete mpasi ya mokongo yango ekotika yo pe okobika? Malamú. Kende pe kóba koloba: “Natondi Yo, Nzambe molingami,” pe Nzambe akokokisa yango.

<sup>202</sup> Ondimi ete okoki kobika, ete Nkolo akobikisa yo; pe okobela lisusu arthrite te, okobika pe na nzoto kolongonu? Ondimi yango? Kende, kóba kopesa Ye matondi, lobá: “Nkolo, nayambi yango na motema na ngai mobimba, pe nandimi yango.”

Bino kuna, bondimi nini mpo na Yango?

203 Yo oyo awa, tia loboko na yo likolo na mwasi oyo afandi mpenza pembeni na yo kuna, yebisa ye ete bokono ya kovimba misisá ná arthrite ekotika ye. Ntango ako. . . ? . . .

204 Nzambe ápambola yo. Ondimi ete okobika sikawa? Zóngá na ndako pe bikisama. Nzambe ápambola yo. Kende liboso, pe lobá: “Natondi Yo, Nkolo Yesu.”

205 Nsango boni? [Ndeko mwasi alobi: “Nkembo na Nkolo.”—N.D.E.] Ondimi ete bokono ya basi wana ekotika yo pe? [“Iyo.”] Pe okobika? [“Natondi Yo, Yesu.”] Kende, pe lobá: “Natondi Yo, Nkolo.” [“Natondi Yo, Yesu.”]

206 Nsango boni [Ndeko mwasi alobi: “Mokuwa ya mokongo ekabwani.”—N.D.E.] Oh! la la! la la! [“Totten.”] Nayebi nkombo na yo. Na—nazaláká ko. . . [“Totten.”] ntango nazaláká mokengeli na lingomba Batiste. [“Totten.”] Totten. [“Della Totten.”] Ndeko mwasi Della Totten. Okómi na bokono ya mpasi na mokongo sikawa. [“Iyo.”] Ekosila sikawa. Ondimi ete Akobikisa yo? [“Iyo.”] Ozali koyeba lisusu likambo esalemaki kuna, na lingomba Batiste ya Milltown, eleki mibu mingi? [“Iyo, nayebi lisusu yango!”] Azali Nzambe yango moko kino lelo. [“Oh, matondi na Nzambe!”] Nzambe ápambola yo, ndeko na ngai ya mwasi.

George Wright, ozali wapi? Ozali komikanisela? Oh, nde. . .

Ondimi ete, soki natieli yo maboko, ná epakweli oyo, ondimi ete okobika? Yaka awa. Na Nkombo na Yesu Klisto, tika ete ábikisama. Amen. Zalá na kondima!

Ee, bino nyonso bondimi na motema mobimba? [Losambo balobi: “Amen.”—N.D.E.]

207 Sikawa, komona mwasi wana, yango ekanisisi ngai lisusu ntango ya kala! Nabosani lisusu nkombo na ye, kasi ngai. . . [Moto moko alobi: “Totten.”] Totten. Totten, ezali solo. Oh, iyo, mwana na ye ya mwasi, ezalaki Bertie. Ezali solo. Ezali mpenza solo. Bókanisa te ete makanisi na ngai ebungi, ezali ete nazali komiyoka moke, boyebi, ezali mwa. . . Nakoki kolimbola yango te.

208 Kasi mpasi ya mokongo na yo esili, madame. Kende, kumisa Nkolo, lobá: “Natondi Yo, Nkolo.”

209 Ondimi ete mpasi na yo ya motema ekosila, pe? [Mobeli alobi: “Iyo.”—N.D.E.] Kende bobele na esengo, pe lobá: “Natondi Yo, Nkolo Yesu,” pe ndima Yango. Malamu. Zalá na kondima sikawa. Kotia ntembe te.

210 Yaka, madame. Ondimi na motema na yo mobimba? Ozali na makambo mingi oyo ezali kotambola malamau te. Yo pe ozali na mpasi ya mokongo. Ondimi ete Nzambe akobikisa yo? Malamu, kende bobele na esengo. Ezali, ezali Ye nde asali ete ómiyoka bongo. Tónda Nkolo. Nzambe ápambola yo, ndeko mwasi.



211 Mbote, mwana. [Mwana mobali alobi: “Mbote!”—N.D.E.] Bondimi ete Nzambe akosilisa motema likolo-likolo ya mwana yango pe akobikisa ye? Bondimi yango? Malamu. Mbote, moninga, tika nápesa yo mbote ya loboko.

212 Nzambe molingami, longóla eloko mabe wana likolo na mwana mobali oyo, pe tika ete ázala na bomoi pe ázala malamu. Na Nkombo na Yesu. Amen.

213 Nzambe ápambola yo, ndeko mobali. Ondimi yango, boye te? Okobika. Kotia ntembe ata moke te.

214 Ozali mwana moke mingi mpo na bokono ya motema. Ondimi ete Nzambe akobikisa yo? [Mobeli alobi: “Iyo, misie.”—N.D.E.] Kende, lobá: “Natondi Yo, Nkolo, mpo na kobikisama na ngai.”

215 Ondimi ete Nzambe akobikisa mpasi ya líkundú yango pe akobikisa yo? Kóba kotambola na esengo, pe lobá: “Natondi Yo, Nkolo.”

216 Azali bobele Nzambe, boye te? [Losambo balobi: “Amen.”—N.D.E.] Eloko se moko bosengeli kosala ezali bobele kondima. Ezali solo te? Bondimeli Mwana na moto na mikolo ya suka?

217 Likambo moko euti kosalema awa eleki miniti moke, pe nakoki te. . . nazali koluka koyeba esika nini esalemaki. Moto moko azalaki na kondima pe asalaki likambo moko. To, ntango mosusu nakozua bango mokolo ya lomingo ekoya, to ntango nakokoka. Yo mo—moto. . . Yango wana lisusu. Otomboli loboko. Ondimi ete Nzambe akoki kobikisa bokono ya motema yango, kobikisa yo, kobikisa mwana na yo ya mwasi, oyo kuna, azali na—na. . . Ondimi yango? Madame Neff, ondimi ete Nzambe. . . Léo Neff. Nayebi yo te, kasi yango nde nkombo na yo. Ozali na bokono ya motema, pe mwana na yo ya mwasi, ya moke, azali na mpasi na lokéto. Ondimi ete akobika? Kondima na yo ebikisi yo. Ndima na motema na yo mobimba.

218 Yo oyo ozali kuna, esika ya kobatisa, ozali kuna pe ozali na mpasi na líkundú, Yesu Klisto abikisi yo.

219 Bondimi? [Losambo balobi: “Amen.”—N.D.E.] Azali motindo moko lobi, lelo pe libela. Tótiana maboko bamoko likolo na bamosusu sikawa. Oh, bókanisa ngonga nini tozali na yango, bókanisa ntango oyo. Bókanisa ete tozali mpenza Liboso na Yesu Klisto, Mwana na Nzambe. Alakaki ete Akosala makambo oyo na mikolo ya suka. Natii maboko na ngai likolo na bilamba oyo.

220 Nzambe molingami, nabondeli ete ópambola bilamba oyo, mpo na lobiko na nzoto ya bato yango, na Nkombo na Yesu Klisto.

221 Sikawa, wana botii maboko bamoko na bamosusu, moko moko na bino, bozali binama ya Nzoto ya Klisto. Molimo Mosantu moko oyo alakaki komonisa basekelé ya mitema pe kosala makambo oyo, Azali kati na bino. Bozali eteni na Ye, pe Ye azali eteni na bino. Sikawa, Alobaki boye: “Tálá bilembo

ekobila baoyo bakondima.” Ezali bino. “Soki batieli babeli maboko, babeli bakobika.” Sikawa, kobondela mpo na yo moko te, bøndela mpo na moto oyo otieli ye maboko, mpo bango bazali kobondela mpo na yo. Sikawa tóbondela elongo, pe tika ete moto na bolembu ata moko te ázala kati na ndako oyo. Mpo na nini tózela ntango molai, ndeko na ngai molingami, ndeko mwasi, Yango oyo, Molimo Mosantu, Nzambe, awa mpenza, Likambo mpenza oyo touti kolobela.

<sup>222</sup> Molingami Yesu, tososoli mpenza Bozali na Yo. Ozongisaki bebé wana na bomoi mokolo wana, na libondeli ya kondima. Nzambe molingami, bato mingi bazali awa oyo tokokaki kotala makambo na bango te, ntango ezali kokende, kasi batii maboko bamoko likolo na bamosusu. Bazali bandimi. Tozali Liboso na Nkolo Yesu Klisto, oyo asekwaki na bakufi, Azali motindo moko lobi, lelo pe libela.

<sup>223</sup> Satana, osílí kolóngama! Yesu Klisto alóngaki yo! Asekwaki na bakufi, pe Azali elongo na biso na mpokwa oyo, kotatola Nsango oyo ya mikolo na suka. Bíma kati na bato oyo! Tíka bango, na Nkombo na Yesu Klisto! “Na Nkombo na Ngai, bakobengana milimo mabe,” pe tobangani yo. Na Nkombo na Yesu Klisto, bíma na losambo oyo!


<sup>224</sup> Moto nyonso kati na bino sikawa, yo oyo ondimi kobikisama na yo, téléma likolo. Moto nyonso oyo andimi kobikisama átelema. Bótombola maboko sikawa, pe bósanzola Ye!

“Nayambi sikawa lobiko na ngai,” lobéla yango Nzambe. Nayambi sikawa lobiko na ngai. [Losambo balobi: “Nayambi sikawa lobiko na ngai.”—N.D.E.] Ozali motindo moko lobi, lelo pe libela, Klisto. [“Ozali motindo moko lobi, lelo pe libela, Klisto.”] Nandimeli Yo sikawa. [“Nandimeli Yo sikawa.”] Sunga kozanga kondima na ngai. [“Sunga kozanga kondima na ngai.”] Amen. [“Amen.”]

Nakosanzola Ye! Nakosanzola Ye!

Bosanzola Mwana-mpate oyo abomamaki mpo  
na basumuki;

Bópesa Ye nkembo, bino mabota nyonso,  
Mpo Makila na Ye elongoli mbindo nyonso.

<sup>225</sup> Bolingi Ye, boye te? [Losambo balobi: “Amen.”—N.D.E.] Na bongo tósanzola Ye. Bino nyonso, wana botómboli maboko, bosanzola Ye, wana ndeko abelemi mpo na kosilisa liyangani. 

*BILEI YA MOLIMO NA NTANGO ELONGBANI* LIN65-0718E  
(Spiritual Food In Due Season)

Liteya ya Ndeko William Marrion Branham oyo, eteyamaki liboso na Anglais na mokolo ya lomingo na mpokwa, mokolo mwa 18, sanza ya nsambo, na mobu 1965, na Branham Tabernacle, na Jeffersonville, Indiana, U.S.A., ekamatamaki uta na bande pe ekomamaki mobimba na Anglais. Ndimbola ya Lingala oyo ekomami pe ekabolami na Voice Of God Recordings.

LINGALA

©2017 VGR, ALL RIGHTS RESERVED

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamu ya Yesu Klisto. Búku oyo ekoki kotekama te, koyíkanisama te, kotiamana na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, komélá:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)